



帶經堂集卷八十九

歙門人程哲校編

新城王士禎貽上



蠶尾續文十七

墓誌銘

昌邑縣儒學訓導桐實王先生墓誌銘

順治初兵戈甫戢文教聿興於時齊魯之間有所謂東海社者六郡魁傑之士多在其後奮跡皇路為國名臣者多矣而長山王先生桐實實有華路藍縷之功諸君子既華貴接踵而先生晚貢於有司僅官昌邑儒學訓導以歿王充有言操行有常賢仕宦無常遇嗚呼其可慨已先生諱孫枝桐實

其字別字歷亭始祖宣為元勳臣官忠顯校尉稱忠顯公始居長山累傳至邦治以文學贈處州府推官子文林公化遠萬曆壬午舉人仕為處州府推官子月雲先生雲郡廩生即先生父也先生生而孝友至性過人十四失怙哀毀踰禮事母徐孺人以孝聞凡所以曲體母意者無弗至也奉母之暇出與諸名士論文角藝無間晨夕先生顧廚之名既徧于二東所居又當二郡綰轂之口諸公車騎往來率主其家至輒投轄閉閣流連窮日夜乃去家以是中落而先生不恤也其友如法方伯若

真官江南宋方伯可發官東粵王侍御元曦官浙江蘇郡丞本眉官河東地皆膏腴先生卒不一至其後崔戶部誼之權關於杭以書招之乃一至焉會崔瓜期將代而額缺以為憂先生慨然出橐中裝百金飲助之垂橐而歸不知其孰為主客也其意氣如此楊少保捷提督山東謀館師於予予以先生應少保以禮延致命三子從受經先生出入幕府將吏皆承望顏色而先生自授經外一無所干預少保顧益重之及其再莅山東也敬禮有加焉晚得昌邑訓導視諸生如子弟誨之無倦自著

三十九
讀書範文範讀書程以課士俸錢所入輒置酒召
諸生會飲供張甚設而饗飧恒不自給嘗質馬韉
以飲客明日以公事徒步謁令令訝而問之先生
謝曰偶然耳令密詢左右始知馬韉在質庫爲持
錢贖之而戒先生勿復然居數日客至不能具酒
輒又質之他日令知一笑而已先生內行尤醇備
孝友無間言同母姊妹四人兩爲撫孤畢其婚嫁
一適韓氏者丁亥賊謝千陷淄川勒紳士具名籍
亂定獲其籍多所連染韓與焉先生鬻腴產千
金身出入軍營卒脫其禍從姊妹三人育于母徐

先生爲具廩貲如其姊妹姑適鄒平張氏有二孤
先生養于家庭名師教之長萬綏成順治丙戌進
士適畢氏者孀而無依生養死葬皆身任之嫁其
孤女徐孺人一日欷歔流涕顧先生曰汝爲姑姊
妹費且萬金家日落產日削汝獨不自爲計乎先
生亦泣然曰兒知慰吾母耳遑計其他崇禎庚辰
歲大祲藏粟尚千斛或勸先生出粟易數千金可
贖歸腴田千畝先生不聽乃計僕役佃戶丁口按
日給散又賑給鄉里之窮乏者全活無算而先生
卒以貧約自終先生爲人誠慤平生無妄語亦不

疑人欺已與人交油油然不爲崖岸就之者如飲
醇醪不覺自醉至于任俠樂施予赴人之急如其
私蓋其天性然生萬曆戊午正月二十日卒康熙
三十三年甲戌十一月初一日得年七十有七元
配李氏前卒有壺德繼配曾氏子二人積租皆諸
生能讀父書女子三人適李之增韓維憲韓維素
孫男五人光佑光裕光耀光振光昌銘曰
骨肉恩衰爰及朋友先生挽之民德歸厚儒林獨
行兩均不朽鬱鬱佳城保艾爾後

范縣儒學教諭候補知縣趙君子靜墓誌銘

君趙氏諱作耳字子靜別字泉山其先自蒙陰遷
益都居郡西之顏神鎮祖振業天啓乙丑進士官
御史終江南布政使司參議父凱美少參公幼子
也生三子君爲之長君天性孝友其爲人剛正而
豪雋少有名諸生間數踏省門不遇引例入貲得
東阿教諭再補范縣例遷縣令需次選人以卒年
四十四君兩當大事一衷古禮在東阿聞母病兼
程數百里歸侍湯藥賦述懷詩四章哀惻動人爲
仲弟立嗣俾之有後鄉黨稱其孝友東阿山水邑
人文夙甲兗郡而學宮頽廢不治科第寢衰君毅

然任興復康熙丙子乙酉諸生劉德楨秦淮秦奕
誥三人先後得雋宋生元吉貧而力學縣試再冠
其軍君公言於使者得補諸生又引置門下晨夕
指授卒為名士在范溝凶歲亟詣郡謁太守請賑
太守朱君曰廣文能如是吾輩忝民司牧愧死矣
乃力請得賑全活萬人范社役繁重破家者纍纍
君力言於邑令勒石永革士民懷之刊碑誦君功
德如漢代故事君既需次歸以親墓在良莊徙居
之其地在鎮東北五里平地忽起小山東西兩溪
抱山而流坳窪呀突具高深之態君考始卜築澗

園於此藝花竹治亭榭景物幽絕君益增葺之余
以丙戌春訪君園居汀渚迴復亂流而渡板橋數
折始達於園入門聞泉聲澌澌在竹中伏而不見
忽有大聲如千兩車作瀑布自懸厓噴薄而下則
東溪與西溪匯處也君乞予為記予諾之而未暇
以為方約重遊未幾而君逝矣嗚呼俛仰之間已
成陳跡王右軍有言死生亦大矣豈不痛哉以君
之才使得民而治之克其請賑免役之政而次第
布之必不愧古之良吏不然而一丘一壑焚香讀
書以終老何不可者而造物奪之如是速耶君卒

三九七十六
以戊子五月五日午時葬以庚寅二月二十八日
祔祖塋之次娶李氏次徐次董子男子三人執珪
執璘執琦子女子二人一適李可珪一未字銘曰
華陰之士若耶之金薛燭淬之而光芒遽沈中散
荒園尚餘竹林羅含舊宅長松載陰悲纏猿鶴痛
感人琴我銘其幽太息盈襟

吳徵君天章墓誌銘

漢魏已來二千餘年間以詩名其家者衆矣顧所
號爲仙才者惟曹子建李太白蘇子瞻三人而已
本朝大一統閱六十載作者亦多矣余獨以仙才

許蒲阪吳君此予之私言也亦天下之公言也君
且死語弟霞曰吾平生知己無逾漁洋先生吾即
死遺詩勿遽出必待先生刪定雖相望二千里而
勿憚跋涉而往求焉且謁誌墓之文吾無憾矣予
居田里聞君之訃爲哀輓以代楚些其末云已空
文字障靜閱莊嚴劫何事勞結集猶煩大迦葉未
幾而霞至將君遺命予詩若爲之讖然嗚呼異哉
豈予與君精神感通雖越在二千里不以幽明間
有如此耶旣次其詩遂爲其銘君諱震字天章其
先遼陽人也父允升中順治二年順天鄉試六年

授蒲州學正十二年賜同進士出身明年卒卒後
幾年吏部按籍銓授知臨潁縣君幼孤母朱有節
操撫君及弟霞等皆成立遂籍于蒲君姿秉殊絕
嗜書如飲食又薄帖括以爲不足爲雖在諸生輒
瀏覽羣籍自六經三史外先秦兩漢下逮六朝唐
宋元明四部之書無弗習也旁及釋老內典祕笈
皆鈎貫其旨趣含咀其英華而尤于五際六義有
深嗜焉初僑居中條山南之永樂永樂唐縣也李
石兄弟三相皆居之詩人李商隱義山亦居之號
玉溪生玉溪者永樂水名也君少而食貧無以爲

養數游京師謁父執友年二十餘矣京師士大夫
無知其詩者予一日過同年榮工部洞門見其詩
云泉遶漢祠外雪明秦樹根又云濃雲溼西嶺春
泥霑條桑至今堯峰上猶上堯時日大異之曰此
非今人之詩也吟諷不絕于口久之君再入京師
一見談藝輒夜分不休如釋迦之有鶩子瀉山之
有寂子相說以解不待往復扣擊君固以謂予一
人知己如后山之於南豐也戊午己未間天子詔
徵博學宏詞之儒備顧問特舉制科海內名士
鱗集闕下君在舉中顧獨耽寂守素不與他人

走健僕囊巨軸宛顏低眉望門求知者競馳逐膠
牢澹泊門有雀羅予以是益重之臨胸馮相國知
君名以扇索其詩君大書二絕句答之其坦率如
是卒以不遇亦不悔也君游燕趙齊魯吳越秦楚
足跡半天下而梁宋間詩尤工晚訪舊天津復與
予相見京師時康熙辛巳君年將六十倦游矣君
好友天下士士之名雅者亦皆援君以自重所至
縞紵贈答無虛日然君胸中涇渭不徇世俗毀譽
涼燠以爲親疎故人亦樂就之所謂嵇叔夜土木
形骸黃叔度汪汪如千頃陂者庶幾似之平生好

仙釋有空諸所有仰青雲睹白日之意情耽隱逸
僕僕四方謀升斗以爲甘旨之奉非其志也嘗買
圃鄭谷之口有竹數百挺黃梅數十株橘三株中
作草堂面雷首肘太華怡然自足將以終老而迄
不得遂嗚呼其可悲也君詩一刻於吳中再刻於
都下三刻於津門今未刻尚千餘篇予刪之不少
貸所存皆卓然可傳蓋痛君彌留不忘誣諉之意
亦以報亡友于地下云爾今當宁右文士苟懷
一藝朝躡芒屨而夕登館閣者何限君之名固已
聞于朝矣而終不遇窮老以死是尤可悲也君

娶祁氏有子二人江蘭早卒崇厚州附學生亦前卒繼娶聶氏孫一逢源尚幼卒以康熙四十三年

甲申七月某日得年六十有一以某年月日葬某阡君嘗以詩賦應制科故稱徵君銘曰

山河兩戒皆首河中重華舊都扶輿所鍾昔在唐

賢摩詰王右丞祁人徙河中允言盧綸河中人義山玉溪李商隱懷州人居永樂表

聖王官司空圖虞鄉人有明名世首兩襄毅楊公博王公崇古勳名

爛然風騷未繼嶽嶽吳生崛起布衣身處菰蘆名

動京師聲滿天下尚謀升斗晚卜菟裘子真谷口

惟君之詩疏越朱絃後有知者移情成連神之往

來河聲嶽色君得古銅印刻此四字修竹梅花徵君攸宅

孝廉申君觀仲墓誌銘

明崇禎十七年三月十九日流賊陷京師太僕寺

丞廣平申公死之不踰月世祖章皇帝入定中

原首下詔令禮部會同部院堂上官諮察死節諸

臣姓名本末以聞於是京朝官自大學士范公景

文以下二十三人皆賜諡而申公得諡端愍端愍

有子三人長涵光高尚其志著書纂言以學行聞

天下人稱聰山先生次涵煜舉孝廉次涵盼順治

辛丑舉進士仕為翰林檢討五十年來海內稱忠

孝之家必首申氏予與聰山先生交最善而孝廉君之子頰又嘗執經太學稱弟子一日重趼走京師請文其父隧道之石未及報而予有秦蜀之役歸踰歲頰以書來告葬期且申前請乃喟然省前事序而銘焉君字觀仲十歲能文章馬文肅公世奇見之歎為聖童甲申之變君年十七侍端愍公于京邸倉皇中猶為君行冠禮手書寄涵光曰行已曰義順數曰命義不可避數不可違即拜辭其母軒太夫人乘馬出至王恭廠聞懷宗大行下馬北向再拜投井死君以孤童子鋒鏑縱橫中哭踊

治喪棺斂成禮父執材君蘭友來弔執君手曰吾友有子矣時盜賊充斥畿南道梗肥鄉人張壯猷者故總兵也與端愍雅故請衛軒太夫人歸里將以君行君泣曰我去父匱奈何乃獨留京師未幾大清義師入關賊奔竄君乘間奪門出徒步扶匱崎嶇兵間以歸服闋補博士弟子順治九年貢入太學再游京師聰山既高肥遯之節君才名又籍甚輦下公卿大夫爭折節禮之與故相國高陽李公柏鄉魏公故尚書蔚州魏公故翰林侍讀學士鉅鹿楊公為詩社名益起順治十八年檢討君

登第入翰林康熙五年君始薦于有司年二十九
矣兩赴公車不見售或勸之仕應曰古人捧檄而
喜為有親也吾何為哉遂絕意仕進家居三十年
以賦詩自娛悅年六十七卒康熙三十三年六月
二日也君孝友過人端愍公既殉國君在京邸寢
食不離匱側卒重繭歸葬母卒居喪哀毀踰禮
事聰山如父愛檢討如左右手兄弟既歿撫諸孤
如其子與鄭孝廉茂素交善鄭死調卹其後久而
不衰塾師白經玉以讎誣陷囹圄君號泣為伸辨
乃解曲周人以官逋粥女君憐而遣歸不索其值

其厚德類如此君學詩于聰山名亞其兄書法大
令時遊戲寫蘭竹似趙子固所著敏菴江杭諸集
若干卷娶李氏繼韓氏子男子二頴顛孫男二居
鄂居郇以某年月日葬某兆銘曰

厥世

從叔萊澳公墓誌銘

高王父太僕公有子六人曾王父大司徒見峰公
居次而浙江按察使柏峰公第五柏峰公子五人
伯少司馬立宇公季考功郎中季木公皆為名臣

三万六千二
仲保定同知完初公以忠節著贈光祿少卿而
臨清叅將熙明公其中子熙明公子五人太學業
澳公其中子公諱與階字陟公少為經生倣儻有
奇氣重交游已然諾名隱隱在齊魯間早歲遇壬
午之變母張太淑人與兄弟三人皆及于難公忍
死銜恤經營喪葬皆成禮兄子士駉士驥能讀父
書則教誨萬方以迄成立有文章名士驥丁酉中
省元甲辰成進士弟子士駉與一姊襁褓失怙恃
則身任鞠育俾有室家以其少孤也推先人大宅
居之嫁孤女匱具視己女加厚考功公有子善長

公為怨家所中公倡族眾力白其冤于巡按御史
卒獲暴雪其為孝義皆此類高王父忠勤祠百年
來載在祀典中更喪亂幾墜公力復之此尤其可
書之大者當壬午城燬知縣南鄭王彥芹死之公
為之棺斂如禮三千里歸其喪長山張君令太平
之繁昌常以千金為託家人無知者張罹法公還
金于張翁封識宛然翁泣謝曰微公古道吾終身
弗知也徐夜曰先生有古風義而不欲以俠名平
生喜為人揚譽如曹丘生排難解紛如魯仲連結
交半天下務全始終如樓君卿當人緩急不以有

無爲解如劇孟論者以爲信然公游吳越流連西湖最久多所賦咏返權崇川登狼山望江海超然有遺世之志歸葺采山草堂將終焉晚贖考功故第居之未幾病謂家人曰吾先世自按察公而下年皆不及六十吾行年六十又五死復何憾以康熙丙辰三月二日終于正寢元配畢氏淄川僉都御史冲陽先生女内治井井凡歲時饗祀兒女婚嫁以逮賓客酒醴竹頭木屑不待公頤指而無不夙辦其撫孤姪嫁孤女尤有恩義以順治丙申十二月十三日卒年四十有二士駢爲制服三年側

室韓氏繼操家棟歷五十餘載有賢能稱于法得祔葬以康熙乙酉七月八日卒年七十有四子三人士駟縣庠生士驪歲貢生候銓儒學訓導畢孺人出士駮縣庠生韓氏出女六人適張協居孫寶仍甯天章張增成王珏張之堪孫男七人啓宁縣庠生啓字譯字官生啓座郡學增廣生啓庭郡學廩膳生啓應啓庾縣庠生啓庇孫女六人曾孫男五人兆俸縣庠生兆儒兆奕兆奭兆奐曾孫女四人其祔也實乙酉十二月十二日銘曰
長白之幽幽梧水之洋洋左太僕之宮右尚書之

藏土厚水深喬木千章樂哉斯丘子孫世昌書之
仲兄禮吉墓誌

兄諱士禧字禮吉亦字仲受曾王父大司徒公會
孫大父方伯贈少司徒公第七孫先府君封祭酒
贈少司徒公第二子母先慈孫淑人兄生後長兄
西樵一歲肩相差也長兄性凝重兄稍跌宕簡易
而家庭孝友則同幼從方伯公宦游吳下同師婁
江周先生並稱穎異崇禎壬午年十六受知學使
鄞錢先生清溪是年大兵下山東新城陷亂離奔
迸無寧居明年癸未親迎趙孺人甲申後亂稍定

歸自山中與長兄復理故業會邑中諸名士修社
事分爲二曰因社曰曉社所謂曉社者兄與長兄
主之二社之宿素英妙各嶽嶽不相下順治丙戌
再行鄉試邑得雋三人張官玉瑄因社中人也于
少叅覺世曉社中人也榮水部開則游於二社之
間于是分者乃合丁亥學使蠡吾吳先生蕃之較
士濟南拔長兄冠軍而兄名第三其文相頡頏名
益噪戊子長兄得雋兄被放自時厥後歲科試必
拔螯弧先登而鎖院輒報罷自乙酉迄丙午凡九
踏省門卒艱一遇而兄意亦倦矣是時長兄與不

肖士禎皆列仕籍叔兄東亭有名公車獨兄浮湛諸生間每學使者按臨稔知兄名字輒呼問西樵無恙乎東亭阮亭無恙乎兄出而歎曰吾與兄弟少共硯席名相甲乙今兄弟皆得稽古力而吾猶與諸年少東塗西抹趨走辟咄于使者之前恥孰甚焉丁未遂棄諸生游太學不復踏省門矣己酉不肖以儀曹奉使淮浦司徒公命兄與俱庚戌長兄再起田間叔兄成進士皆在京師其冬不肖亦報命京師而兄歸里侍養兩大人溫清唯謹辛亥秋先淑人感痰疾兄日夕侍良瘥壬子八月疾

復作見背會長兄叔兄在京師不肖奉命典蜀試惟兄侍司徒公擗踊含斂閱一載長兄以毀致疾兄與不肖等日在左右晡始散歸七月長兄歿兄弟朝夕聚哭繆幕凡百日又虞傷司徒公心則又謀所以曲娛司徒公者蓋自癸丑迄乙丑十餘年間兄無一日不侍司徒公側每侍飲司徒公不命退雖漏盡參橫不敢退也乙丑六月不肖奉命祭告東粵便道省司徒公兄率子姪出候城南別墅不肖見兄鬚鬢盡白念伯兄叔兄久彫落惻然動歸養之思八月復命遂請假歸省而司徒

公棄養此不肖終天之痛腐心淪骨而不能自解者也彌留之頃擗踊含斂亦惟兄一人在嗚呼是長兄叔兄與不肖終天之痛不能得之于吾父母者而兄得之是吾三人之深愧于兄者也兄即以田園終老其與仕宦孰得失哉乙丑迄己巳五年中與兄熒熒相倚祥琴之後時有家集則兄與太液三兄未嘗不在如御書堂石帆亭菜根堂北樓晒柯堂皆常所游止之處或鳥啼花發撫時感舊思司徒公則悲思西樵東亭兩兄則悲往往罷酒而起詎意不肖以己巳十月赴京師而太液兄

以癸酉歿不五載兄又繼逝視爾時御書石帆諸遊止之處又如前塵昨夢不可髣髴矣然則不肖之悲何時而已乎嗚呼痛哉甲戌方伯祭酒二公皆邀國恩得贈經筵講官戶部右侍郎祖母母皆贈淑人兄聞之喜丙子春不肖再奉命祭告秦蜀歸而便道上冢行焚黃禮兄偕內兄蕭亭張先生幡然二老率子姪出候城西別墅相見悲喜甚于往時會猶子啓灌病篤兄年雖七十必日再眴視或至丙夜始歸寢不肖數言非老人所宜兄情至勿爲止也灌以八月歿兄時矍鑠無恙孰

意甫半載而兄竟長逝耶痛哉家世自曾王父以來大司徒公壽七十九大司馬公八十四方伯贈司徒公九十三先司徒府君亦七十有七司徒司馬生不及見矣吾祖吾父晚年皆龐眉覆目具壽者相兄似之又神清骨癯如山松海鶴咸謂兄弟中期頤者必兄也而豈意其止於是耶痛哉顧長兄之歿纔四十八叔兄亦甫五十兄所得於天視兩兄不為不厚而子女孫曾內外且三十人又兩兄所不能望者庶幾以此稍紓不肖之悲乎兄少號名飲晚歲頗減然不能廢杯杓中年罷舉益留

意岐黃之書于痘疹尤精鄉人襁負而至者踵相接也兄一一視之無倦色其貧者更予良藥歲所全活無算人謂兄子孫衆多以此時長兄以詩倡于家故兄弟皆嗜詩兄所刻抱山詩集凡二卷嘗和月泉吟社詩五十餘章多警策未及鋟梓今其稿不知猶存否間為小詞嘗視不肖于廣陵過露筋祠題壁云女郎遺跡秦郵路晚涼門外青楓樹石竹響空祠蕭蕭三兩枝可憐嗚咽水斜日西風裏那更感人情估船吹笛聲毗陵鄒程村愛之取入倚聲集少好金石篆刻老亦棄去蓋兄平生任

達多漫興大抵類此不肖甲子使粵兄使猶子啓
 溶侍行丙子使秦蜀又使啓深侍行在原之義良
 厚客冬家累北上兄與嫂孺人親臨祖道瀕行兄
 撫女婉惻然曰汝行爲我致語汝父吾老矣不知
 復能相見否痛哉痛哉尚忍言哉兄生天啓丁卯
 十月初二日卒康熙三十六年二月十八日得年
 七十有一自廩監吏部考授州同知娶趙氏子男
 四人啓溶例監生啓溶附學生啓沉歲貢生啓深
 歲貢生候選訓導女子二人一適鄒平張秉鑑一
 適益都孫續厚孫七人兆郊庠生啓溶出兆柳庠

生啓溶出兆郊庠生兆邗兆鄗兆邲俱啓深
 出孫女七人溶出者五深出者二曾孫一人祖聃
 兆柳出曾孫女二人亦柳出

四姪墓誌銘

今年四月五姪歸窀穸予既誌其墓六月四姪卒
 其孤兆杲將以冬十月庀葬事而請予一言嗚呼
 予二十年來每爲友朋親串碑誌輒作數日惡矧
 骨肉之間哉於是復忍涕而誌之四姪啓澤字湛
 遠先大父尚書府君之曾孫世父曲江公孫三兄
 太液士鵠之冢子也母鄭氏予家自太僕司徒司

馬以來家世孝謹尚書府君晚年常舉以爲訓子
姓奉之不敢忘姪幼而濡染家法又及聞尚書公
之緒言動止不踰尺寸讀書日有程課沉潛探索
文日益工順治末施愚山侍讀以僉事督山東學
號稱憐才賞激之拔童子第一自是八試皆當上
駟名藉甚然省試輒不見收始先考尚書府君夢
中庭桂花盛開手折其三最後復折一枝顧視三
兄在側即以授之其後予與六兄西樵十兄東亭
先後成進士府君謂三兄曰夢有徵矣汝獨無徵
其在汝子已而姪屢試復凶驗而姪有子兆杲嗜

學工文章夢之徵也其在斯乎姪常從史子重修
族譜予守官京師荏苒未果姪別纂世系一卷刻
之家塾又承父志於大槐之側勅善行祠祠之北
即二世祖善人公故宅其念祖睦族之志未嘗一
日忘也嘗一游武林一游宛陵歸於所居之後作
蕙圃五畝之區臺池略具蒔修竹執香草藥畦花
徑曲折蔽虧暇日邀羣從飲酒賦詩以相娛樂予
數奉使過家及休沐里居花時令節姪必置酒爲
壽召羣從家讌或以事謝不至姪輒不懌曰家庭
之集莫遠具邇非飲酒宴樂之謂也而可謝弗至

三十九
耶蓋惇睦之誼姪與予夙有同心自姪臥病垂三載而此會頓稀繼自今誰復明此義者嗚呼悲矣姪平生事親孝友愛兩弟有共硯之風蓋孝友惇睦其天性也予於諸從子中最愛四五兩姪兩姪亦暱就予五姪豁達坦易而姪老成慎密其承家學識大體則一也予七十歸田而五姪已前歿今姪復逝矣執筆臨文感懷疇昔不自知老淚之縱橫也生崇禎庚辰二月二十四日卒康熙四十六年丁亥六月十二日得年六十有八癸未貢于鄉學以明經終配伊氏同里巡撫雲南都察院右副

都御史伊公闢女男子一人兆杲丁丑拔貢國學教習候銓知縣女子五人其四壻馬銘王應美李德奕李德宣一幼未字側室閻氏出孫三人祖喬祖鏗祖倪孫女三人曾孫一人宸覲其兆在吳河之陽從父阡系之銘曰
老成云亡後生孰式亭榭寂寥花竹蕭瑟德行可書湘東銀筆銘無愧辭視此樂石

五姪墓誌銘

第五姪啓沆字辰遠先祖考尚書府君之曾孫世父侍御公之孫父士和母張氏先是崇禎十五年

大兵徇山東新城陷張不辱死之遺藐孤甫三歲
即沆也又二年甲申而侍御公暨孺人于氏同殉
國難士和亦以諸生從死事具明史忠義傳沆甫
五歲育於曾祖尚書公所凡十年順治癸巳尚書
公捐賓客乃返侍御公故第居之姪生而廣穎豐
頤儀觀修偉類侍御公性孝謹事曾祖溫清定省
如成人事繼母韓終身如一日族鄙無間言居恒
曰吾不幸少孤吾無祖從祖即吾祖也吾無父諸
伯叔吾從父也吾終鮮兄弟諸從父兄弟即吾兄
弟也以是先考尚書府君以下皆愛而器之為人

坦易洞達胸無城府與人言輒傾肺腑讀書觀大
略頗有神解間為詩風神秀逸數與第九姪浣相
倡和然不肯竟學能飲酒五斗不亂酒酣以往岸
幘雄辯聲效作洪鐘響傾其座人始補諸生有聲
旣餼廩於學矣累踏省門不遇始游太學以上舍
生終昔穎川陳氏代有重名而史謂其公慚卿卿
慚長言人爵之不足貴也姪行修於家庭德孚於
州里旣無忝忠孝清白之裔矣以視陳氏之有長
文孰為優劣哉生崇禎庚辰十二月初六日卒康
熙戊寅三月十二日得年五十有九配高氏刑部侍

郎淄川高公珩女子一人兆笏歲貢生女三人適
李德琪王宗融伊應簡孫一人祖述孫女三人以
康熙四十六年四月初二日葬東原系河之溪與
侍御公兆域相望銘曰
忠臣之孫孝子之子讀書飲酒不愧名士竹林之
游悲哉已矣祖父在望爾魄依止

帶經堂集卷八十九

帶經堂集卷九十

歙門人程哲校編

新城王士禎貽上

蠶尾續文十八

墓誌銘 行述 祭文

誥封一品夫人朱母王太君墓誌銘

前光祿大夫總制浙閩少司馬兼御史中丞朱公
康熙庚辰以王事卒於淮上歸葬魚丘余既銘
其墓矣又五年乙酉夫人王氏卒其明年冬將祔
於司馬之墓子緇等復以銘請按狀夫人長山人
沁州同知重明之子太常少卿楨之妹幼有令儀
父兄難其配司馬公方為孝廉失蔣夫人難其繼

者聞夫人之賢遂委禽焉年十七歸于朱事君姑
 姚太夫人以孝聞處嫂婦娣姒和而有禮撫妾媵
 子女慈惠而有恩紀內外秩秩自太夫人以下無
 間言司馬之兄勤愍公總制直隸河南山東以八
 旗屯田事直言忤權輔被逮請室司馬職納橐餽
 不謁選入久之事大白詔復其官賜諡勤愍
 仍官其子紱少卿公始就銓除知盱眙縣會歲大
 侵荒政為淮西第一夫人盡出簪珥篋衣佐之司
 馬以卓異徵當入為臺省而兄子適官大廷尉引
 嫌得刑部主事歷兵部郎中出為天津道僉事調

直隸守道叅議夫人佐助之功為多丁卯司馬膺
 異數自少叅峻擢都察院右僉都御史巡撫廣
 東夫人勗以飲泉沉香之搯甚至癸酉再擢總督
 福建浙江兵部右侍郎兼都察院右副都御史夫
 人皆從行雞鳴戒旦三十年如一日也甲戌司馬
 罷歸田里未幾而有南河之命崎嶇扶病以往
 夫人憂之疽發於背夢神人藥之愈已而司馬計
 至夫人驚痛哀怛率諸子營喪葬畢事而病作矣
 夫人與司馬公白首相莊教諸子讀書服官皆能
 自樹立同生姊歸鄒平張氏晚而食貧賙卹終始

三子
無倦撫從子紋授室授產迄有成立其卒以康熙
四十四年八月初六日得年五十有九初封孺人
進封宜人恭人累封至一品夫人子五人緇候補
部主事絳湖廣永州府知府綱兵部武選司主事
九齡鶴齡女三人李廷蕙李秩臨孫叔讓其適也
孫男十人崇簡崇道崇謙崇勳賓理崇夏翊典端
宙崇侃崇儀孫女十一人葬以四十五年十二月
十八日初司馬元配贈一品夫人姚氏繼配夫人
蔣氏卒皆別葬至是并祔禮也銘曰
地道無成而代有終含章順承德容言功夫為名

臣子為循吏身為女宗慶及苗裔紫泥煌煌光燭
九幽名書琬琰魄妥松楸

誥封太宜人趙母楊太君墓誌銘

太宜人姓楊氏順天諸生應奎女也年十五歸故
孝廉贈綏德州知州趙君哲公為繼室哲公父潛
夫先生避亂客濟南久之哲公舉順治甲午鄉試
丁酉南遊吳越卒江上太宜人時年二十五將以
節死姑胡太夫人勉令無死曰藐茲諸孤責將誰
屬且若吾兩老人何因挈太宜人從潛夫先生於
歷下家焉太宜人天性和易視側室楊太宜人子

于京如所出于京事太宜人孝人不知其爲側室
子也于京登辛酉賢書又七年丁卯於是太宜人
年五十有五於例得旌于京請于巡撫錢中丞得
旨建坊如故事于京自城武教諭以卓異舉擢
知臨潼縣再擢知綏德州適 聖駕西巡于京奉
命扶輦行十數里 上顧問嘉其應對明白
特旨超擢河南府知府太宜人喜且誠曰 君恩
至重其何以稱塞惟是夙夜無怠庶有藉以報
國無忝先人于京視事數月治行卓然巡撫侍郎
徐公賢之將特疏薦於 朝而太宜人適以疾終

郡署于京方扶柩東歸是時徐公被 召爲戶部
尚書旣入見 上問河南好官誰第一者公以于
京對且曰惜以內艱去矣 上曰良牧不易得其
諭吏部特留之是時于京歸未及濟南三十里聞
命蹙然例不敢辭讓遂請給假營葬卜以乙酉
三月十二日祔贈君子玉函山之兆贈君元配潘
宜人則葬京師西山之祖域東偏者也于京從余
遊舊矣余嘗誌贈君墓石今之銘太宜人固所不
得辭也太宜人生明崇禎庚午年十月二十八日
寅時卒康熙四十三年十月初二日酉時得年七

三石字
卷一
十有五男子三人長于京即太守君次于申早世
次于蕃歲貢生女子三人孫二人鶴洲豸清孫女
二人曾孫二人松齡楨廷銘曰
伯起嗣賢盈川著姓猗歟恭人塞淵以敬既嫺母
教亦擅女宗生平令範勁節凌松飾悅待期治命
易簣生榮死哀考終好德峰頽天姥石徙媯皇泉
寒趵突春黯洛陽馬鬣雖封仍膺 疊誥棹楔崢
嶸終古大造

誥封淑人伊母何氏墓誌銘

前巡撫雲南都察院副都御史翕菴伊公以康熙
二十年卒于軍余既為哀輓四章已又銘其隧道
之石越二十一年而元配淑人何氏卒子訓導君
作楫不遠千里來京師乞銘余與公少同舉進士
壯同官中朝公以大理卿建節于滇余與四三故
人祖帳都亭黯然別去明年訃至京師日月不居
忽忽已二十餘年復執筆述淑人生平卒葬之概
其能無今昔之悲乎淑人何氏世為新城望族父
聞性諸生淑人笄而于歸婉嫺內則事君舅君
姑就養無方事本生舅姑亦如之舅姑皆謂曰賢
中丞與弟望江君少同學為時聞人淑人以女紅

三子九子
五
佐讀無倦順治戊子中丞以第一人領解額乙未
舉禮部成進士改庶吉士授御史淑人以君姑春
秋高願留侍養不赴京師洎姑病淑人晨夕奉湯
藥日不再食卒則哈斂陳慟皆如禮哭踊盡哀族
黨稱孝母或以爲沽者蓋其代中丞爲子者如此
中丞以御史巡按山西淑人勗之曰君清白之操
妾固習之矣刑罰出入關乎生死吾家積善累世
君襲餘慶致身清要今以儒生膺巡守重寄可不
慎歟中丞在河東矜慎庶獄前後疏請全活至七
百餘人逮撫雲南密疏請禁擄掠得保室家者萬

計後來國史必有書之者而淑人相夫之賢烏可
沒也中丞旣以潔廉自勵服官中外三十餘載而
家無餘財淑人居恒荆布而已初中丞官京師遇

覃恩將以已身 恩例馳封于所生淑人亟贊

成之族黨尤稱其誼以康熙四十一年三月六日
終于內寢距其生天啓三年二月七日得年八十
有一子三人作霖候選教諭卒作楫平度州訓導
作德庠生女七人孫男八人孫女十人曾孫十人
曾孫女三人五世孫女一人婚嫁皆名閥已詳中
丞誌故不具書以四十二年某月日祔葬于中丞

之 賜阡銘曰

遺華膺兮桓孟之風壽耄耄兮祔此幽宮松柏桐
子鬱鬱葱葱我書樂石子昭示無窮

誥封淑人宜母趙氏墓誌銘

淑人趙氏滿洲貴族也自曾祖蒼什公以開國勲
舊官內大臣世為顯官父車克公順治中歷官尚
書康熙初入政府卓然為 兩朝名臣淑人其季
女也生而端淑貞靜孝于父母早受列女傳通曉
大義餘事習女紅莫不精絕年十五歸今順德太
守宜君君之父光祿公歷事 三朝官至操江都

御史世襲一等阿思哈尼哈番兩家閱閱赫奕列
戟相望淑人居之澹然無驕志汰色事君姑高太
夫人如其父母羹湯滫瀡必手調而後進與太守
君相莊如賓明星戒旦以佐學殖之成君初仕知
茶陵州太夫人以湖南卑濕不欲往命淑人行亡
何武昌有夏寇之警列郡惶駭君從容以咨淑人
淑人曰君奉 天子命典是州與城為存亡耳然
則何以全吾子女曰事難逆計脫得出虎口必全
君子女以見太夫人否即同死不貽君內顧憂也
君泣而謝焉其慷慨明大義如此居十載內遷工

部員外郎君日夕勾稽簿書旁午比趣裝車發于
門徒御望于道舟楫于涖江之澁部署秩然皆淑
人夙辦之君不知也其才敏絕人又如此既抵京
師登堂起居太夫人顧而樂之久之君以九卿交
薦出守邢州淑人奉太夫人往就養旨甘之外務
撙節以佐君之廉君有遺愛于茶陵父老子弟歲
必數至淑人懽然延欸不啻親串時其燠寒省其
衣服飲食皆泣拜而去而自奉綦縞自如也戊寅
冬十月屬疾其明年夏增劇六月十八日遂不起
距其生丁酉得年四十有三再遇 覃恩封宜人

進封淑人有子廷棟女三人婚嫁皆名族君之言
曰昔第五倫有執爨之妻而政聲成于會稽阮景
茂有擁絮之婦而章安歌思其德予雖不敏心嚮
往之非淑人以清儉之操相予曷以成予志予三
復而悲之爲敘而銘焉銘曰
家盛金貂而性甘荆布相夫子成廉吏而安之若
素白楊蕭蕭青松夾路後有式者女宗之墓

誥封淑人張氏墓誌銘

康熙庚午余自詹事遷中丞今湖南巡撫金公爲
御史又九年金公爲中丞余適自戶部侍郎來爲

大夫于是兩人者交甚篤悉其夫人內治之賢甚具未幾中丞膺朝命出撫湖南以書來徵夫人誌墓之文序曰夫人姓張氏奉天人父弘猷仕至廣西桂平道副使夫人少嫻內則舉止有法度父官長沙府知府而中丞父顯之公以副都御史巡撫湖南會李定國之亂楚黔方用兵先中丞日籌兵食議戰守謂張公才引贊幕府之畫相得甚歡時今中丞方九歲與夫人齊年因議婚姻夫人年十四于歸事君舅君姑至孝柔滑之奉蘭蒞之獻惟禮經是式佐中丞讀書服官交相勗勉有雞鳴

之誼中丞歷郎署擢御史陟列卿清白一節凜先中丞之訓弗敢忘夫人內助居多焉甲寅滇逆發難中丞以戶部員外郎兼佐領從戎行間軍于襄陽進取常德底定黔蜀不解甲者十年弗遑內顧夫人獨侍姑崔太夫人于京師奉槃濁簞益謹太夫人忘中丞之在遠也戊午太夫人考終疏食水飲擗踊斂葬易戚咸備宗鄙觀禮者咸歎美之中丞之言曰吾有母吾不及事而夫人代事之吾母既歿吾不及葬而夫人代葬之其言有餘痛焉中丞在軍中久子以竣以坦夫人身教之讀書授室

女亦有家嗚呼賢矣生以順治甲申十二月二十七日卒以康熙丙子正月二十五日累遇 覃恩誥封淑人贈夫人子二以竣前温州府平陽縣知縣以坦鑲藍旗佐領女三長適泉州府同知張岐次適正黃旗佐領李林森次適杭州府同知祖允焜孫三鈺鐸安柱以己卯四月二十日葬于房山縣東北馬家溝之新阡銘曰
峨峨大房燕之奧室鬱鬱佳城卜云其吉煌煌綸誥賁于墓門寵及九原福及後昆

趙母李孺人墓誌銘

孺人李氏教諭趙君珪之配也世為德州人五世祖逢時山西布政使父允禎廣西左江道僉事母董封太宜人孺人幼婉嫕嫻內則名聞於宗邨教諭父孝廉公方為子擇婦曰李氏有家法是生賢女遂聘焉年十五歸於趙事君舅君姑備色養昕夕無惰容繼姑李毒發於背孺人輾轉扶掖手自浣濯病良已久之復病瘍家人將迎醫不許曰婦善事我何以醫為已而孺人嬰危疾孝廉公曰婦孝無天理勿恐也晨起盥漱罷為誦孝經百遍三日而病愈教諭君官青州之高苑邑僻小士不習

詩書孺人以簪珥佐教諭君倡爲文社鼓舞訓迪未幾士風一變教諭君好與賓客飲往往閉閣不聽去孺人豫飭中廚所須咄嗟而辦數十年如一日教二子甚嚴舉動必軌於禮不少假顏色子婦晨起各從其事茶鐺飯竈必精必潔皆手自經營位置下至醯醢醬醎各有定所中外斬斬門以內無纖塵至婚嫁喪祭諸大事必稽於禮每戴星而起危坐中堂寂然若無事而事無弗集姑舒氏之昆弟家貧歲歉私鬻其女孺人宛轉贖之養如己女孺人弟方伯濤常語家人曰趙氏姊非惟趙氏

母儀汝曹當以爲法生崇禎庚辰年三月十九日康熙四十五年丙戌十一月十一日無病而逝得年六十有七子三人如韓歲貢生娶楊氏如曾太學生卒娶張氏如陸庠生娶金氏女一人適貢生劉佺孫男二人泌如韓出倫如陸出孫女五人二如韓出一如曾出二如陸出以丁亥年十一月初三日祔葬於教諭君之新阡銘曰必敬必戒無非無儀采蘋采藻接跡風詩男女效績實維女師其魯之敬姜耶其杜之泰姬耶

李母王孺人墓誌銘

予未弱冠則識江餘李先生先生嶽崎歷落人也
嗣是三十年往來安德甫即次先生高軒已至門
登其堂圖書花竹秩秩如也先生歿叔子棟來從
予遊棟雋朗工文章而季子檉繼起才名相上下
予恒歎江餘先生有子矣或告之曰先生性豪放
不屑一切諸子雅志問學蓋母教爲多云予以是
知先生配孺人之賢康熙丙子孺人卒踰年將祔
于先生之墓棟等匍匐千里來請銘按狀孺人姓
王氏德州人父夢卜官經歷孺人少習書史諳大
義年十六歸李時先生有子楨元配朱孺人出也

孺人愛之如已出先生令河津值叛將姜瓖之亂
修城浚池爲死守計孺人曰與城存亡臣子大義
妾不難以身殉君奈藐孤何孤之不存李氏其不
祀乎乃泣而訣間行千餘里道梗遇賊置所生幼
女道旁而抱楨走匿山窟會從騎殼滿射賊賊應
弦倒獲免河津大猾張家璧者爲賊內應城不守
先生巷戰奪門出西渡河走長安謁制府孟忠毅
公請兵恢復三晉而先生竟罷歸家人迎河干先
生顧楨悲喜歎曰微汝母寧有今日耶先生盛年
坐廢意氣無所發攄里居好賓客酒酣絲竹六博

投壺奕棋之戲雜進于前供張之具孺人皆宿戒
 咄嗟立辦先生顧不知也自課諸子置膝上口授
 孝經論語成誦始遣就外傳暇則以女誠訓諸女
 婦進退不失尺寸婚嫁必折衷古禮里中推為掌
 故多取則焉晚歲教諸子尤慎交友恒曰聖人三
 益之訓汝知之乎見往來皆先生長者則喜為治
 具間與紈袴少年遊不懌久之曰此非汝父昔日
 客也清齋繡佛日誦金剛圓覺諸經通其大指婢
 子有及笄當嫁者其家將粥幼女以贖孺人聞之
 曰吾不忍其得一女失一女也折券以女還之癸

酉棟舉京兆孺人猶及見也康熙丙子八月十三
 日卒距其生崇禎壬申四月得年六十有五子四
 人楨國子學正先卒森國子助教棟康熙癸酉科
 舉人樞廩膳生女子三人一適國子典籍趙廷講
 一適太學生于德慎一適貢士金廷遶孫十二人
 某某孫女十三人曾孫六人某某曾孫女四人銘
 曰何德能自漢中女又聞昔聖夫人並嘗知
 女子之道無非無儀孰相夫子出險即夷家人嗃
 嗃式終順慈德容功言身則備之百世而下觀此
 銘詩

三六
張孺人室張孺人行述

康熙三十八年六月七日孺人張氏病卒于京師
予悼亡至是而三矣老不能朝夕哭而悲從中來
不可斷絕拊膺自歎中夜反側昔張夫人逝嘗賦
悼亡詩三十六章陳孺人逝賦詩亦十六章今孺
人復舍我而逝也欲賦詩以寫其悲憤無聊之思
而胸臆間如有鯁不得吐聊追憶平生書其梗槩
使孺人之賢不至與煙草同滅沒而予之悲庶亦
稍寫其萬一焉孺人淮之山陽人本周氏其歸予
甫髫髻修眉曼睞雙瞳如剪秋水明慧婉孌張夫

人愛之俾從己姓孺人少機警能彊記張夫人善
病凡箱篋笥庫之屬一以委之康熙十五年丙辰
正月予內艱服闋上京師九月張夫人病卒于家
孺人日夜侍湯藥歿則哭踊不自勝自時厥後二
十餘年每諱日必嗚咽流涕雖張夫人逮下之仁
而孺人之賢可知也丁巳二月先司徒府君命孺
人來京師視予眠食十月陳孺人來歸孺人左右
欣助予悼亡之餘賴兩孺人相慰藉以無內顧憂
其年兒啓沂來京邸甫五歲耳孺人撫之不啻顧
復嘗飲泣對之曰吾聊藉以報夫人恩德也戊午

予自郎署改翰林孺人悲喜交集曰吾曹得見君之清華而夫人顧不及見耶因泣下已未長女阿端生庚申予遷祭酒四方文章之士輻輳邸舍鮭菜之供咄嗟立辦蓋孺人夙昔習見張夫人雜佩贈問之風故能黽勉有無如此居京師八年所初無疾疾甲子冬予遷宮詹學士陳孺人生女阿宮尋有祭告南海之役迫歲莫出都與兩孺人別于安德明年六月事竣過家省覲司徒公居一月還朝復命請假歸省尋奉諱居廬丙寅夏孺人忽嬰疾自是每歲夏必卧病迄秋冬乃漸差初孺人

疾醫無能愈者予檢方書得紫河車丸方商諸仲兄然之自是日服河車丸無間自乙丑至己巳山居五載孺人與陳孺人左提右挈內職修舉終歲不聞詬誶聲而家人嗃嗃內外秩秩然也遇諸子婦諸孫諸女孫恩誼尤篤庚午三月予自詹學遷副都御史五月兩孺人上京師六月阿端殤孺人哭之神傷愈益病癸酉陳孺人卒彌留以阿宮屬孺人推燥就濕心力交瘁未幾阿宮又殤孺人日夜隕涕是冬病大作骨見衣表丙子正月予復銜命祭告西嶽江瀆蜀道之難孺人昔稔聞之予

年既遲暮再叱馭而往孺人意黯然不樂然又慮予道路怫鬱損眠食強破顏相慰予亦慰之曰子善病歸慎醫藥以慰予心秋以為期當復相見迨初秋予歸過家則孺人方屬疾喜予萬里生還執手一笑病為之差予九月報命京師孺人仲冬乃至載塗復病丁丑春夏以六君子湯間河車丸服之飲食遂加于昔戊寅七月子蒙上恩陟總憲孺人心喜起居勝常夜坐談笑或至漏三十刻無倦容然冬春患嗽是時女婉病癰孺人守視往往一夜不歸寢孫女將出閣孺人為治奩具不知

已病之已深也四月杪病忽劇醫皆束手六月初七日竟以不起彌留之頃顧視日景歎曰吾不自意福命遂盡今日客死京師與諸婦諸孫女不獲一訣豈其命耶遂絕是日巳時也得年四十有三所生二女皆前卒乃其視女婉女宮與諸女孫無異已出也孺人性穎慧得人意予兩悼亡後飲食起居賴孺人曲加調護而孺人又死誰復知予心者九月十三日孺人生日也至是女婉又死天乎慘矣悲哉昔在癸酉陳孺人歿甫百日而女宮死相距七載若合符節誰為司命吾欲問之何辜于

三子年五
天而降割至此吾老不耐爲文聊質言敘述梗槩
挂漏實多吾負孺人矣悲哉

家祭東亭兄文

維康熙四十五年十二月初七日吾兄東亭先生
與嫂焦張兩孺人暨姪啓灌將就窀穸前經筵講
官刑部尚書同胞弟士禎痛哭流涕而告曰嗚呼
哀哉天道無知竟如是耶孔言仁者壽易言積善
餘慶佛言前因後果其言豈皆誕謾而無徵耶不
然何顛倒舛謬一至此耶吾兄平生孝友忠信恭
慎仁厚信于家庭孚于鄉里即不敢妄希聖賢以

稱善人君子豈有愧焉乃讀書懷古攻苦二十餘
年年三十九始成進士銓補京職有日矣而一夕
忽嬰危疾倉皇永訣慘極矣兄有二丈夫子啓灌
啓灌皆已成立以爲吾兄未竟之志或可酬之二
子也不謂乙丑灌卒丙子灌又卒灌一子連生又
夭死于是吾兄竟無後矣慘哉痛哉世有孝子弟
弟善人君子而得天之報如是酷者哉顏子天折
盜跖考終古人如此造物者其有知耶其無知耶
吾兄之歿忽忽已二十六年而不能葬者以啓灌
歿而嗣未立也已卯旣議立嗣而事又中輟弟日

三百五十五
夜痛心徒以備官于朝因循至今甲申歸田每
念兄繼嗣未立大事未襄中夜思之若負芒刺丙
戌秋冬間往復商榷至再至三始以三姪第四子
兆邵立為灌嗣以承兄後弟且悲且喜兄昔者有
後而無後今則無後而有後矣既于十一月立嗣
即于十二月謀葬二十六年之浮厝今乃歸萬年
之宅悲哉痛哉吾兄有靈實鑒臨之其亦悲耶喜
也今夕之奠餞兄大歸言念平生音容如在尚其
鑒弟之苦心哉嗚呼哀哉尚饗

祭小僕紀綱文

康熙三十六年十二月二十二日寇犯唐山小僕
紀綱年甫十八倉卒身往赴敵登屋手射賊中之
尋中賊火銃而斃其主人唐山令哭之慟事聞京
師予不禁哭失聲為文祭之曰嗚呼哀哉五倫之
理天經地義萬古為昭主僕之分猶君臣也士大
夫佩服詩書顧畏名教一旦履危蹈難而慚負君
父者多矣爾年少為廝僕目未嘗知書當狂寇薄
城勢如飈馳豕突而爾一身直前搏戰殪賊是時
已置生死於度外所知者惟主人耳天不佑善俾
爾身殉嗚呼此士大夫之所難而爾允蹈之爾身

三三廿四
雖死爾名不朽爾忠魂毅魄萬古如生將來志乘
載之金石永之爾雖死猶不死也昔郎之戰魯人
欲勿殤童汪錡孔子曰能執干戈以衛社稷欲勿
殤也不亦可乎爾之年雖殤爾之名行則聖人之
所許勿殤者也爾之目可以瞑矣爾有母在吾當
養之終其身爾其勿含憾於九原嗚呼哀哉

帶經堂集卷九十

帶經堂集卷九十一

歙門人程哲校編

新城王士禛貽上

蠶尾續文十九 跋

恭跋 欽賜 御書後

康熙庚辰夏六月廿八日蒙 恩賜 御書帶經

堂扁額謹紀述于居易錄末卷今年壬午四月六

日再蒙 恩賜 御書信古齋扁額回憶戊午夏

初蒙 恩賜存誠格物二扁已二十五年矣二十

五年中三蒙 御筆題 賜堂額榮寵踰涯視宋

學士蘇易簡獲賜飛白玉堂之署四字一時輒侈

三子十
為盛事臣之蒙 恩何啻什倍恭為摹刻懸于蓬
華之居而什襲 御墨于寶櫝謹紀 頒賜年月
以示子孫勿忘報稱云

又恭跋 御書

六月初九日 召集內閣九卿及翰詹卿寺科道
各部郎中四品以上官于 保和殿傳 上諭云
尋章摘句華麗詞藻非帝王之本 朕四十餘年
惟日兢兢未嘗少釋萬幾自警有始無終之誚念
茲在茲也政事之暇頗好書射歷年以來所積臨
摹字幅賜卿等觀之 臣 士禎得絹素大字一幅共

二十七字云惟正是視玄黃匪惑非禮不觀儀刑

是則慎爾所觀無愆斯德臨米芾首尾凡小墮三

曰淵鑒齋 長寸餘闊 八分白文 康熙宸翰 方一寸三 分朱文 勅幾清晏 方一寸四分 朱文

是年七月廿三日恭紀

又恭跋 御書

煙霞盡入新詩卷郭邑閒開古畫圖又 御筆題

賜都察院左都御史 臣 士禎今恭懸西城別墅

恭跋 東宮 賜王翬山水清暉大字

右山水清暉大字乃 皇太子睿書以 賜吳人

王翬者端嚴適勁結構精密昔人目唐宗書以為

鳳翥鸞迴又云風骨巨麗其殆兼之蓋皇上御書備臻二王之奧譬諸雲漢為章於天而萬幾餘暇游藝翰墨以身為教前星少海離照萬方誠

熙朝之盛軌簡策所稀覯也暈以工畫名江左數十年一旦出菰蘆來京師通籍金門橐筆禁籞其還山也皇太子親灑睿翰取謝靈運詩句以寵其行洵奇遇已暈歸其珍祕之俾子孫永寶侈殊恩於無極不僅為藝苑佳話已也

跋世說新語

此本亦是吾小時故書中有朱筆點閱者乃順治

癸巳年手蹟即長兒涑始生之歲爾時吾年二十今六十矣流光如馳不堪把玩撫此舊物如遇故人兒輩其寶之康熙癸酉莫秋十有七日阮亭書於京邸匏墨齋時在戶部

跋唐詩品彙

宋元論唐詩不甚分初盛中晚故三體鼓吹等集率詳中晚而略初盛攬之憤憤楊仲弘唐音始稍區別有正音有餘響然猶未暢其說間有舛謬迨高廷禮品彙出而所謂正始正音大家名家羽翼接武正變餘響皆井然矣獨七言古詩以李太白

三子
三
爲正宗杜子美爲大家王摩詰高達夫李東川爲
名家稍誤是三家者皆當爲正宗李杜均之爲大
家岑嘉州而下爲名家則確然不可易矣聖人復
起不易吾言

跋舊唐書文苑傳後

舊唐書爲李巨川作佳傳列于文苑始終無貶詞
新唐書則置之叛臣傳特書其導韓建殺十六宅
諸王及定州行營將李筠之罪使非宋景文則巨
川首惡網漏吞舟矣春秋之義謂何然新書旣以
僕固懷恩李懷光李錡等爲叛臣又列李正已師
古師道吳少誠少陽元濟于藩鎮一進一退其義
何居每開卷至此輒爲憤懣移日

跋唐書李商隱傳後

義山爲黨人所惡乃李宗閔楊嗣復令狐絢白敏
中一輩小人耳遂謂其詭激無特操爲當塗所薄
然則必背公死黨乃爲有特操乎史官之無識如
此孔子曰鄉人之善者好之其不善者惡之

跋唐詩小補

唐武后遊石淙倡和詩首御製自皇太子相王以
下和者十六人相王之後次梁王武三思次內史

三百六十一
狄仁傑次奉宸令張易之麟臺監中山縣開國男
張昌宗又次鸞臺侍郎李嶠鳳閣侍郎蘇味道夏
官侍郎姚元崇奉宸大夫汾陽縣開國男薛曜書
久視元年五月刊于平樂澗之北巖諸詩惟李嶠
沈佺期二篇差成章餘皆拗拙可資笑柄耳黃岡
葉井叔封知登封縣撰嵩陽石刻集記始著錄之
而刪去九首刪之不為無見而朱竹垞太史憾其
闕略以得觀全碑為幸則亦好奇之過也當北朝
淫昏之世二張每侍行幸預倡和已令千古齒冷
而列銜于李嶠蘇味道輩之前諸人亦俯首甘之

當時君臣上下豈復知有羞惡之心耶可為一歎

初跋王介甫唐百家詩選不全本

宋中丞牧仲在吳中得王介甫唐百家詩選殘本
自第五卷王昌齡李頎起至第八卷錢起盧綸司
空曙止又自十三卷王建起建詩二卷
逸上卷至十六卷許

渾止中間第六卷沈千運已下全取元次山篋中
集而益以李嘉祐等七人通三十八家蓋亦詳於
中晚而略于初盛宋人選唐詩大槩如此意初唐
盛唐諸人之集更五代亂離傳者較少故耶牧仲
謂今世所傳十卷是章安楊蟠所改竄非介甫元

三子
本此雖闕本而真面目尚在山陽閻百詩若云曾
見閻賈持翻刻本正二十卷惜無從見之矣

跋王介甫唐百家詩全本

王介甫唐詩百家選全本近牧仲開府寄來新刻
乃常熟毛辰所得江陰某氏藏本計百有四人有
乾道己丑蘭臯倪仲傳序略云予自弱冠肄業於
香溪之門嘗見是書頃有親戚宦南昌得之臨川
以歸惜其道遠難致且字畫漫滅故鏤版以新其
傳云余按其去取多不可曉者如李杜韓三大家
不入選尚自有說然沈宋陳子昂張曲江王右丞

韋蘇州劉春虛劉文房柳子厚劉夢得孟東野槩
不入選下及元白溫李皮陸諸家不存一字而高
岑皇甫冉王建數子每人所錄幾贏百篇介甫自
序謂欲觀唐詩者觀此足矣然乎否耶世謂介甫
一生好惡拂人之性此選亦然故物自可寶惜然
謂為佳選則未敢謂然請以質諸後之善言詩者
當知余言不妄

跋百家詩選

嚴滄浪云王荆公百家詩選蓋本于唐人英靈間
氣集其初明皇德宗薛稷劉希夷韋述之詩無少

增損次序亦同儲光羲而下方是荆公自去取大曆以後其去取深不滿人意況如王楊盧駱沈宋陳拾遺張燕公張曲江王右丞賈至韋應物孫逖祖詠劉昫虛棊母潛劉長卿李賀諸公皆大名家而集皆無之其序乃言觀唐詩者觀此足矣豈不誣哉今人但以荆公所選斂衽而莫敢議可歎也與予前論暗合若符節益信予所見非謬然予實不記滄浪先有此論也

跋詩總聞

同年梁溪秦宮諭留仙松齡以寫本詩總聞相寄宋

人汝陽王質撰其例曰聞南聞風聞雅聞頌又聞音聞訓聞跡聞事聞物聞用聞章聞句聞字而終以總聞其書援據亦博而好與毛鄭異亦絕與朱子不合如衛詩柏舟燕燕鶉之奔奔二子乘舟鄭詩狡童將仲子有女同車青青子衿之類甚多如云鄭忽言行蓋多近賢不可以成敗論人所謂狡童非忽也又云文姜鄭忽所辭者也以為賢而不娶識者更詳之此言最允然於齊詩南山猗嗟諸篇皆無異詞後有宋人跋云右雪山王先生詩說二十卷其家櫝藏且五十年未有發揮之者臨川

三子集
卷之九
貳車國正韓公攝守是邦念前輩著述不可湮沒
乃從其孫宗旦求此書鋟梓以傳命工經始而日
強分符來此公餘取讀之其刪詩序實與文公朱
先生合至以意逆志自成一家真能寤寐詩人之
意於千載之上斯可謂之窮經矣淳祐癸卯季冬
上澣吳興陳日強書此跋謂與晦翁合亦非也

跋五代史

王勉夫紀聞載東坡一日與歐陽公論五代史公
曰修於此竊有善善惡惡之志坡曰韓通無傳烏
得爲善善惡惡公默然千秋公議當時坡公固已
發之是謂諍子然劉壯輿作五代史糾繆以示東
坡坡答以王介甫嘗謂某當修三國志某不敢當
正畏如公之徒撫拾其後耳

跋五代史闕文

王元之五代史闕文僅一卷而辨證精嚴足正史
官之謬如辨司空圖清直大節一段尤萬古公論
所繫非眇小也如敘莊宗三矢告廟一段文字淋
漓慷慨足爲武皇父子寫生歐陽五代史伶官傳
全用之遂成絕調惟以張全義爲亂世賊臣深合
春秋之義而歐陽不取于全義傳略無貶詞蓋即

三子學
舊史以成文耳終當以元之為定論也元之吾鄉
鉅野人其小畜集三十卷黃俞邵虞稷千頃堂有傳
本惜未及借錄

書文中子後

世或疑文中子以為房杜李諸公未必皆出其門
者陋儒也予讀司空圖文中子碑云天生文中子
以致聖人之用得眾賢而廓之以俟我唐故梁衛
數公皆為其徒恢文武之道以濟貞觀治平之盛
圖唐人也又文中子鄉人也其言如此可信耶不
可信耶吾故特筆之以結此輩之舌若門人薛收
等議謚文中子則詳唐書文苑王勃傳文中子之
名則附見王績傳

跋合刻馬令陸游南唐書

唐庚三國雜事云先主父子相繼始終號漢未嘗
一日稱蜀陳壽黜其正號狗魏晉之私意廢史家
之公法改漢為蜀猶五代稱李璟為吳劉崇為晉
今五代史南唐北漢世家未嘗以吳晉名之也蓋
宋人之論已以南唐為吳王恪之後比于昭烈矣
歐公五代史世家首南唐而胡恢陸游馬令之書
曾見疊出豈非有深意存焉乎近興化李映碧清

廷尉取馬陸二氏之撰爲經別作南唐書而雜采江南野史釣磯立談玉壺清話諸書爲緯殊爲有見予嘗謂五代中原之君史家所謂正統者皆盜賊僭竊無足比數惟唐莊宗雖以沙陀賜姓而能手除篡賊復唐社稷則君子引而進之不忍斥也其于南唐亦若是焉已矣以南唐爲正統不猶愈于朱溫石敬瑭之流哉

跋越絕

越絕言舜父頑母嚚兄狂弟傲尸子言舜事親養兄爲天下法是舜又有兄也尸子又云其游得六

人曰雄陶方回贖牙伯陽東不識秦不空皆賢者也或益以靈甫爲七人然則舜旣徵庸而七人者何以皆不見舉諸子之言誕妄不經如此呂覽淮南新序說苑之類類此者多有君子存而不論可矣

跋谷音

谷音二卷皆宋末人詩上卷王澮以下凡十人率任俠節義之士下卷詹本以下凡十五人則藏名避世之流也番陽布衣瀟湘漁父以下五人不可得其姓字要之皆宋之逸民也其詩慷慨激烈古

澹蕭寥非宋末作者所及是時謝臯羽林霽山輩
皆以文章節義著于東南而又有此三十人者與
之遙爲應和亦奇矣此書毛氏汲古閣本與月泉
吟社合刻最工亡友施愚山備兵湖西又嘗刻之
清江蓋杜清碧其郡人也適見黃少司馬雪洲集
記此書初得之臨淮顧德光氏後又見江西刻本
多帝虎陶陰之憾間託南都博洽之士是正稍復
其真虞部主事吳時冕見而愛之遂刻諸真州分
署以傳知弘正以來此書蓋不一刻矣集中諸人
本末各有耿耿不沒者宜有神物在在護持之也

黃名瓚字公獻揚之儀真人

跋東都事略

王稱東都事略淹貫有良史才與曾子固隆平集
頡頏上下然蜀志載稱父禮部侍郎賞著玉臺集
東都事略一百二十卷則此書亦如遷固之史記
漢書本于談彪耶但未得此書全本不知果百二
十卷否稱于父書之外有所增益否稱亦不當沒
其父之名掩爲已有也俟更考之賞眉山人

跋劉蛻文泉子

唐劉蛻文冢銘自評其文粲如星光如貝氣如蛟

三三三
宮之水此喻最妙文冢在今潼川州予康熙壬子
曾過之爲賦一詩唐末古文並稱樵蛻蛻文泉子
予所手錄然不逮樵遠甚樵之文在大中時惟杜
牧可稱勅敵耳

跋說楛

焦澹園太史以博雅名萬曆間所表章古逸書最
富子周著說楛七卷標新領異亦錦機之緒餘也
澹園山東日照人以軍籍居金陵故序有幾領東
省解額之語蓋爾時尚存南北兩籍云此本金陵
門人張景載仍渠所貽

跋汗簡

郭忠恕著佩觿汗簡二書並載宋史藝文志而汗
簡不傳于世今秀水朱氏有鈔本六卷吳門新刻
逼古可寶也首有李建中題云汗簡元闕著撰名
氏因請見東海徐騎省鉉云是郭忠恕製復舊白
字部末繁字注脚趙字下俱有臣忠恕字驗之明
矣後有天禧二年七月十七日開封府判官虞部
員外郎李直芳序又庚寅六月所南鄭思肖爲山
礪葉君題汗簡後是書所援據自古文尚書以下
凡七十一家

跋王損仲二書訓故

黃山谷云論文則文心雕龍評史則史通二書不可不觀明王侍郎損仲維作雕龍史通二書訓故以此二訓故援據甚博實二劉之功臣余訪求二十餘年始得之子孫輩所當寶惜

跋中州名賢文表

中州文表三十卷明成化中河南提學吳人劉昌欽謨所集元許文正衡姚文公燧馬文貞祖常許文忠有壬王文定惲魯文靖翀六家之遺文皆河南產也馬與魯色目人一居光州一居南陽遂著

籍足徵元時之寬大許魯齋馬石田王秋澗三集余皆及見其全餘則多賴此書以有傳于後世欽謨名士常撰吳先賢讚其風流好事槩可想已昔曾假此書于黃俞邵氏未及鈔錄庚辰十二月于慈仁寺市覩此本乃兼金購之

跋七修類纂

郎瑛七修類纂舉東坡跋林和靖詩詩如東野不言寒書似西臺差少骨以西臺為南唐李建中謬甚南唐太傅李建勳非建中也建中宋初人為西京御史故稱西臺其書與楊風子先後齊名蘇黃

常稱之郎未知耶

又謂謝無逸以蝴蝶詩得名號蝴蝶後李商隱襲其語云云則是以唐人蹈襲宋人矣更可一笑

跋嚴滄浪吟卷

二則

余訪滄浪先生吟卷積有歲年康熙戊申始得宋刻于亡友程太史翼蒼一則幸夙願之頓酬一則感故人之新逝秋牕篝火展卷憮然虞山錢先生不喜妙悟之論公一生病痛正坐此然儀卿詩實有刻舟之誚高新寧亦然大抵知及之而才不逮云是歲重陽前一日記于京邸

跋焚椒錄

契丹國志后妃傳道宗蕭皇后本傳云性恬寡欲魯王宗元之亂道宗同獵未知音耗后勒兵鎮帖中外甚有聲稱崩葬祖州云云而已焚椒錄所紀耶律乙辛張孝傑輩讒構賜死之事紀無一字及之又錄稱后為南院樞密使惠之少女而志云贈同平章事顯然之女志言勒兵似嫻武略者而錄言幼能誦詩旁及經子錄中所載射虎應制諸詩及迴心院詞皆極工而無一語及武事且本紀道宗在位四十七年改元者三清寧咸雍壽昌初無

太康之號而錄載乙辛密奏太康元年十月據宮
婢單登及教坊朱頂鶴陳首云云已上皆抵牾不
合不可解也按遼史宣懿皇后傳雖略而與焚椒
錄所紀同蓋契丹志之疏耳志惟載天祚文妃善
歌詩其詠史云丞相朝來劍佩鳴千官側目寂無
聲云云按史亦載此詩是騷體非律也

跋蹈海錄

陸右丞蹈海錄一卷京口丁元吉撰首宋史陸秀
夫列傳次熊開傳次輓詩有龔序五言方回曾微
一坏土魚腹葬君臣龍仁夫無地叅黃鉞終天慘

玉衣仇遠甘抱白日沒不知滄海深方鳳鰲背舟
中國龍胡水底天七言湯炳龍人心自感興元詔
天意難同建武時盛彪平地已無行在所丹心猶
數中興年數聯最警策未載吳萊桑海遺錄序右
丞遺文丹陽館記一首

跋長慶集

白樂天論詩多不可解如劉夢得雪裏高山頭白
早海中仙果子生遲沉舟側畔千帆過病樹前頭
萬木春等句最爲下劣而樂天乃極賞歎以爲此
等語在在當有神物護持悖謬甚矣元白二集瑕

瑜錯陳持擇須慎初學人尤不可觀之白古詩晚
 歲重複什而七八絕句作眼前景語却往往入妙
 如上得籃輿未能去春風敷水店門前可憐八月
 初三夜露似珍珠月似弓之類似出率易而風趣
 復非雕琢可及

敷水在華州東水出羅敷谷酈注敷水又北逕集靈宮西予數過其地憶白詩亦為之流連而不發也

跋歐陽四門集

唐歐陽詹四門集八卷卷中棧道銘弔九江驛碑
 材文最佳其自明誠論有云尹喜自明誠而長生
 公孫弘自明誠而為卿張子房自明誠而輔劉公
 孫鞅自明誠而佐嬴安得此離經畔道狂諄謬悠

之論耶韓文公與之同時同年獨作原道原性諸
 篇不愧稱大儒矣

跋趙松雪集

康熙丙子余奉朝命祭告華山憩王山史待菴
 閱架上書有趙松雪集乃先太師大司馬公較刊
 本遂告於主人攜歸先太師所刻書甚多亂後惟
 文選刪注沈文端公鯉集尚存餘悉不可問矣得
 此如拱璧也

跋蔡中郎集

蔡邕集有劉鎮南碑即劉表也按獻帝初平二年

夏四月誅董卓夷三族邕亦瘦死初平四年改元
興平又二年改元建安而表以建安十三年卒邕
之死至是已十六七年矣安得復起九原而爲其
碑頌耶碑又云太和二年葬于先塋太和乃曹叡
年號按不以建安二十五年篡漢改元黃初在位
七年而叡嗣立自建安十三年至是又二十一年
距邕之死且四十年矣然則此碑果出邕手否乎

跋林逋詩集

和靖詩特工五言如畫岩松鼠靜春棧竹雞深水
風清晚釣花日重春眠何減昔人所舉草泥行郭
索雲木叫鈎輶耶若咏梅疎影暗香之句及雪後
園林才半樹水邊籬落忽橫枝一聯七言惟此可
稱絕唱他殊不類何也

跋陳后山集

陳無已平生皈向蘇公而學詩於黃太史然其論
坡詩謂如教坊雷大使舞又有詩云人言我語勝
黃語扶豎夜燎齊朝光其自負不在二公之下然
予反復其詩終落鈍根視蘇黃果位遠矣任淵云
無已詩如曹洞禪不犯正位切忌死語恐未能然
後數年乃得宋刻正天社任淵注本也按天社新

津山名淵新津人此集乃弘治十二年南陽王文
莊公鴻儒所刻有王雲社任淵二序

跋梁園集

許左史殿卿少與滄溟倡和齊名鄉曲今梁園正
續集詩殊不足當滄溟下駟何也弘正間歷下有
劉天民希尹者官吏部郎同時視邊尚書華泉稍
後其詩古選實勝邊特近體不逮耳而左史獨擅
名者則以滄溟弇州輩張之也名詎足盡信哉

跋喬莊簡公集

喬莊簡公白巖集四卷有文無詩弇州先生爲之

序公德業勳望卓犖剛正卓然爲弘正名臣其止
巡幸請迴鑾二疏可與日月爭光碑版序記諸雜
文亦典質有體裁蓋公少受業西涯石淙二相之
門而與空同華泉輩爲友其師資固遠有端緒非
偶然也少與虎谷晉溪二王稱河東三鳳以二王
之視公不猶華太尉之與邴管哉

跋宋藝圃集

內鄉李子田蓀撰宋藝圃集二十二卷凡二百八
十人時在隆慶初元海內尊尚李王之派諱言宋
詩而子田獨闡幽抉異撰爲此書其學識有過人

者然於宋初載廖融江爲沈彬孟賓于之流皆五代人也又取馬定國周昂李純甫趙胤龐鑄史肅劉昂霄諸人皆中州集所載金源產也而與周平園范石湖等並列淄澠混淆誰能別之所宜刊正

跋黃四如集

宋末文弊甫有黃四如仲元著文獨學檀弓公穀可謂豪傑之士其文多贅牙詰曲不諧于俗惜往往雜語錄腐習不加淘汰故不能追樵蛻于三百年之上亦可惜也

跋陳子昂文集

陳子昂文集十卷詩賦二卷雜文八卷與陳氏別傳及經籍志合子昂五言詩力變齊梁不須言其表序碑記等作沿襲頽波無可觀者第七卷上大周受命頌表一篇大周受命頌四章曰神鳳曰赤雀慶雲毗頌其辭諂誕不經至云乃命有司正皇典恢帝綱建大周之統曆革舊唐之遺號在宥天下咸與維新賜皇帝姓曰武氏臣聞王者受命必有錫氏軒轅二十五子班爲十二姓高陽才子二八命爲十六族故聖人起則命曆昌必有錫氏之規云云此與楊雄劇秦美新無異殆又過之其下

筆時不知世有節義廉恥事矣子昂真無忌憚之
小人哉詩雖美吾不欲觀之矣子昂後死貪令段
簡之手殆高祖太宗之靈假手殛之耳

跋王虎谷集

正德中給事中屈銓祭酒王雲鳳先後疏請刊定
正德元年以後現行事例編集成書頒布中外又
請瑾釋奠如魚朝恩故事銓不足言雲鳳號稱名
臣乃亦覲顏爲此何也雲鳳與喬莊簡王瓊齊名
號河東三鳳莊簡尚矣瓊與雲鳳何異華歆之龍
尾乎虎谷集詩文皆未成家然一時名流如石邦
彥喬白岩儲柴墟邵二泉王陽明韓苑洛五泉皆
與唱和亦一噉名之士

跋王徵士集

王徵士集四卷都少卿元敬所定有元敬及浦杲
序徵士名彞字常宗又號媯雌子洪武初與高季
迪同預修元史後亦同死魏觀之難元敬稱其古
文明暢英發又或以爲吳中四傑之一以常宗代
張羽來儀者今觀其詩歌行擬李賀溫庭筠殊墮
惡道餘體亦不能佳詎可與高楊頡頏上下乎固
知高楊徐王之說誕而無徵矣此本嘉定門人陸

廷燦扶照所刻牧仲中丞所寄

跋吳禮部集

元吳師道禮部集二十卷詩九卷雜文十一卷師道金華蘭溪人與許白雲講明金仁山之學而與黃晉卿潛柳道傳貫為友故其學問文章遠有統緒時稱其為文清勁善持論友人朱簡討竹垞常稱之此本乃崑山徐少宰果亭兼義寫以見貽者吳至治辛酉進士仕止國子博士致仕加禮部郎中故集稱禮部云

吳師道仙山秋月圖詩自注宮扇馬遠畫宋寧宗后楊氏題詩自稱楊妹子詩中感慨濟王之事以楊妹子為楊后誤矣

跋呂衡州集

唐衡州刺史呂溫集十卷詩二卷雜文八卷溫于詩非所長贊頌等時有竒逸之氣如史所稱凌煙閣功臣贊張始興畫像贊及集中三受降城古東周城望恩臺成臯諸碑銘皆有可傳者惟武侯廟記持論頗謬同時劉禹錫柳宗元亟稱之溫亦佐文之黨八司馬之貶以使吐蕃獨免于禍嘗與竇羣羊諤共傾李吉甫而其父渭亦附裴延齡皆非

長者蓋其門風如此而其父亦如裴吳繼皆非
文之跋沈下賢集與心對也蕃鄙與于斷嘗與寶
唐沈亞之下賢集十二卷昔人謂其工爲情語善
窈窕之思觀集中秦夢記異夢錄湘中怨詞歌者
葉記等信矣然頗類傳奇小說姚鉉槩不之錄無
亦以其誕謾不經耶至以滄寇李同捷之誅朝廷
與柏耆牽連同貶實以兩河諸將之譖姑謫罰以
悅其心耳而晁公武遽以爲亞之狂躁輔者爲惡
愚矣哉吾讀下賢與鄭使君書而悲之

跋徐公文集

徐公文集三十卷南唐徐鉉寶臣著宋都官員外
郎胡克順所撰天禧中表進批荅甚優五代時中
原喪亂文獻放闕惟南唐文物甲于諸邦而鉉錯
兄弟與韓熙載爲之冠冕常侍詩文都雅有唐代
承平之風入宋與湯悅即殷崇義奉詔撰江南錄至金
陵亡國之際不言其君之過但以曆數爲言誅後
主文尤極悱惻讀者悲之老學叢談記常侍入汴
市一宅居後見宅主貧甚曰得非市宅虧價而至
是耶吾近撰碑文獲潤筆二百千可以相濟其人
堅辭亟命左右輦致之其厚德如此集外又有稽

神錄若干卷予家亦有寫本
元余忠宣公青陽集五卷廬守張君某新刻本已
卯七月門人合肥王裒所貽讀其序記諸篇立說
一本經術皆醇儒之言而忠義之氣往往鬱勃憤
發于行墨之間公之大節與日月爭光夫豈襲而
取之者耶若華州大寧宮記予謂不減羅鄂州世
必有知言者

跋鳴盛集

鳴盛集三卷乃廣陵門人殷彥來譽慶自閩中手

鈔寄余集爲明初林鴻子羽著成化中温州府知
府邵銅編刻徐燭家藏本也卷首有劉尚書崧吳
興倪桓二序余歸田以來京師故人無尺牘相存
者獨彥來與吳江徐太史電發欽音繹不絕又屢
鈔秘書遠以相示古道不墜賴有斯文因識其緣
起俾子孫勿忘

再跋鳴盛集

林子羽鳴盛集四卷其同郡邵銅所編銅作後序
稱中憲大夫温州府知府成化三年丁亥歲也按
邵銅天順間以御史言事忤權奸與張鵬等十三

人皆左遷知縣載葉文莊水東日記

跋獨孤常州集

唐獨孤及至之毘陵集二十卷補闕安定梁肅所編肅後序稱門下生蓋其門人也集首有虔州刺史李舟序末有吳郡祝允明跋云是吳文定寬所抄東閣本予按皇甫湜論業一篇歷評唐人文章稱獨孤之文如危峰絕壁穿倚霄漢長松怪石顛倒谿壑今讀其文殊不盡然大抵序記猶沿唐習碑版敘事稍見情寔仙掌函谷二銘琅邪溪述馬退山茅亭記風后八陣圖記是其傑作文粹略已

載之權德輿議及謚曰立言遣辭有古風格濬波瀾而去流宕得菁華而無枝葉其摳衣入室之徒皆足以掌贊書而秉方策及之為文可徵矣卒謚

曰憲及位止牧守而得謚亦非常格

跋癖齋小集

康熙己巳庚午間在京師每從朱錫鬯黃俞邵借書得宋元人詩集數十家就中以長沙陳泰志同為冠因抄其所安遺藁一卷以周弼伯弼汶陽藁臨江鄧林性之皇考曲金華杜旃仲高癖齋小集附之數子者名不甚著而其詩實足名家按吳正

傳跋杜端父墨蹟云杜汝霖仁翁學于胡安定爲
李公擇所稱其孫陵陵五子旗伯高旃仲高旂叔
高旒季高旒幼高伯高登呂成公之門同時陸務
觀陳君舉葉正則陳同甫咸稱其文淳熙開禧中
兩以制科薦有橋齋藁仲高占湖漕舉首與吳獵
楊長孺善著杜詩發微癖齋藁叔高嘗問道考亭
與辛幼安諸公游端平中以布衣召入秘閣校讐
季幼亦相上下幼有粹裘集葉正則爲序人稱金
華五高伯高爲最旃子去輕此帖乃去輕手筆宋
末士競舉子習而杜氏一門子孫獨尚古文章今

里中殘碑斷碣可見者悉有家法下至字畫亦異
此紙深得山谷老人筆意要非不習而能也

跋白石道人集

宋姜夔堯章白石集予鈔之近百首蓋能參活句
者白石詞家大宗其于詩亦能深造自得自序同
時詩人以溫潤推范石湖痛快推楊誠齋高古推
蕭千巖俊逸推陸放翁白石游于諸公間故其言
如此其詩初學黃太史正以不深染江西派爲佳
跋于湖集

宋張孝祥于湖集僅四卷門人謝堯仁弟華文閣

直學士孝伯序之于湖紹興甲戌狀元高宗謂爲
謫仙人天性倜儻勇于爲義真西山曰于湖生平
雖跌宕至于大綱大義處直是不放過每作爲詩
文輒問門人視東坡何如而堯仁謂其水車詩活
脫是東坡然較蘇氏畫佛入滅次韻水官韓幹畫
馬等數篇尚有一二分劣又謂以先生筆勢讀書
不十年吞東坡有餘矣觀集中詩亦是學步江西
尚未到后山境界遽欲上擬坡公安矣在南渡之
初亦下放翁遠甚

跋臞翁詩集

臞翁詩集一卷宋長樂敖陶孫器之所著器之非
江西詩派中人而詩深得江西之體其評詩最精
當自云此評手書兩紙一貽莆陽劉潛夫一貽同
舍朱仁叔其自貴重如此韓平原當國時題詩臨
安酒家壁弔趙忠定公云九原若遇韓忠獻休說
渠家末代孫幾懼于禍亦竒男子也

素臣平生不相識年且八十有五介予門生吳永
年翰林三千里以詩就正且欲待此蓋棺其意亦
良勤矣會余歸田不果作報計君之年今已餘九

跋稗言集

十餘矣對雪憮然書此

宋施宿字武子湖州長城人

今長興縣

紹興間為左司

諫又為淮東倉曹言路與有嫌欲劾之無以為罪

宿嘗以其父所注坡詩鏤板倉司因摭此事坐以

贓私右見西吳里語按坡在湖為小人所譖興詩

案之獄至高宗朝正蘇黃詩文大顯之日而小人

猶能為崇如此又在湖州尤奇牧仲中丞近刻此

注于吳下因錄緣起于後以備遺事云

施宿武子又嘗參諸家本訂以石鼓籀文刻于淮

東倉司辯正詳備見宋章樵石鼓文釋吹景集引

之以為奧衍奇博可與鄭漁仲爭衡亦一博雅好

古君子也

帶經堂集卷九十一

人一幀又嘗屬江陰令陸次雲訪其所畫楚辭九章九歌聞陸已購得之付裝潢迄未見報云

再跋梧溪集

梧溪集七卷乃景泰七年丙子南康府知府陳敏政重刻陳刻後序述原吉家世甚詳原吉有子掖洪武初任通事司令轉翰林博士兼文華殿經筵事卒官掖子徠嘗以才德薦至京師未官而卒子輅宣德中以秀才舉授南康府照磨未幾卒二子曰顏曰孟不能歸遂僑居星子之東澗祖母黃母徐躬紡績以教二子俱有成云集首有至正間周

伯琦汪澤民二序序言原吉初學詩于延陵陳虞卿虞卿與柯敬仲俱事虞邵菴得其傳與有元盛時楊范諸公齊驅惜未著其名俟再考之虞卿官東流尹亦序云

跋史西村集

吳江門人徐翰林電發欽寄西村集集凡二十八卷其鄉先輩史鑑明古著也明古成化間高士與沈啓南齊名而與吳原博王濟之李貞伯友善為三原端毅公所知按集中有曾祖文質府君行狀祇言洪武中縛貪吏詣闕事無一語及靖難而吳

三五十一
文定為明古表墓止云曾祖彬亦無一語及遜國
則致身錄之作果不足信然當時胡為而有此說
遂傳千古之疑雖博洽諳典故如虞山錢公亦不
能知也

集是陳仲醇繼
儒選初字醇儒

跋趙氏玉臺集

大唐新語謂梁簡文好作豔詩江左化之謂之宮
體晚年改作追之不及乃令徐陵撰玉臺集以大
其體今觀玉臺新咏所錄皆靡靡之音正足推波
助瀾何區雅鄭此集予在京師曾見宋刻此吳中
寒山趙氏臨刻本可謂逼真

跋野古集

右野古集如干卷龔詡大章所著詡崑山人所謂
金川門卒者也先生既變姓名遁歸其後周文襄
忱欲薦之力辭曰吾仕未傷于義恐負當日城門
一慟耳以成化己丑卒年八十八歲靖難忠臣被
禍最烈即或不死亦流離困阨終其身如先生晚
節優游田里以壽終者一人而已

跋竹友集

二則

宋二謝無逸逸幼槃邁皆江西詩派中人潘邠老
亦派中人也幼槃竹友集云邠老嘗作詩云滿城

風雨近重陽邠老後無逸兄用此句足成四篇
今去重陽只數日風雨不止淒然有懷作二絕句
念泉下二人不再作不覺流涕覆面詩云地下修
文兩玉人清詩傳世墨猶新却因風雨重陽近獨
立蒼茫淚一巾阿兄溫潤玉界導我友澹薄朱絲
絃只疑蟬蛻游人世醉插茱萸若箇邊邠老詩句
至今藝苑流傳爲重陽口實而二謝同時有詩迄
無知者因識之緒成一則詩話亦使邠老不寂寞
也集十卷詩七卷雜文三卷文雅潔楚楚有法度
不減其詩

筇箸之筇有平上二讀元次山能帶筇箸全獨而
保生蘇子美松江觀漁詩擬來隨爾帶筇箸謝幼
槃嚴陵詩身前萬事一筇箸皆在青韻今小本詩
韻止收筇字誤

跋袁海叟集

袁海叟詩集若干卷康熙壬午雲間門人周庶常
彛策銘所寄鈔本用羅紋牋寫之甚工有大復空
同二序陸儼山序又董宜陽題編首謂爲海叟手
定國初刻于張氏者久燬儼山編次爲別本而陸
序云海叟集舊有刻又別有選行在野集者暇日

與獻吉共讀之又刪次為今集云按明初詩人共推高季迪為冠而大復獨以海叟為冠空同許為知言今讀其詩古詩學魏晉近體學杜皆具體而微耳遽躋之青丘生之列未免失倫故予謂從來學杜者無如山谷山谷語必已出不屑裨販杜語后山簡齋之屬都未夢見況其下如海叟者乎

跋句曲外史集

句曲外史雜詩一卷元張雨伯雨著詩多拗體予最喜其絕句如凌波仙子塵生韞空谷佳人玉鍊容不奈天寒風露早日高猶傍錦熏籠

三香圖

弁山南

下幽人宅萬箇長松水一瓢月到三層樓上夢鯉

魚風起駕春潮

萬壑松濤

雞犬茅茨接暝烟平林如薺

遠連天急披奇句無人賞已近飛鴻滅沒邊

黃子久畫

頗有坡谷遺風自題云乙酉歲自春徂夏霖雨時多日處幽篁中未有裹飯過子桑者閑弄筆研寫詩盈冊以自料理耳詩凡五十五首子英過之持去勿示不知我者雨告

跋眉菴手錄詩集

李方伯紫瀾

濤

自桂林歸求為母夫人作傳貽予

楊孟載手錄眉菴詩集五大冊雖書法未為當家

然先哲故物可寶惜也每幅有子京墨林項叔子
琴書清暇等印蓋禾中項氏藏本也卷首自識行
末有業字號三字云予自離吳門未嘗作詩間有
所述不復存稿邇來西江意或得追理舊業而案
牘山積雖罷竭駑鈍猶不及十之二矧從容筆硯
間哉固知有愧于穆之也冬十一月宜春侯上猶
臨江冬字至侯字一勾下
又一圈句疑有誤予奉省檄執鴈謁軍門修聘禮
自己未至丙寅往返者八日凡目所覩身所歷念
慮所思得短章五七言古律絕句四十首如春山
早鶯初出深谷舌強語澀殊不成音欲棄置水中

復念子友方君以常每以不得見舊稿為憾姑存
此以貽方君君長于詩尤工唐人五言予友張羽
來儀為倡和友云吳人楊基識後書五言一篇云
今夕復何夕云云其詩分體不分卷凡若干首不
止序所云奉使四十首也按孟載始以薦為江西
行省幕官此蓋江西時所自書首卷起寓懷十二
首與今本同但今本作感懷耳方君不知何許人
眉菴集中有秋懷方員外詩張靜居集亦有元日
雪懷方員外以常送方員外歸吳興詩所云晴春
入舊臘積雪含清暉是也方蓋吳興人

跋鹿皮子集

近日金華刻元陳樵鹿皮子集郡人盧聯所編刻于明正德戊寅今邵陽縣丞會稽董肇勳重刻于婺郡凡古賦十五首為一卷詩三卷卷首載宋文憲公所撰墓銘董有序頗佳又云原刻有慈谿周旋序佚去不載甲申董自秦中以卓異入京 陛見來謁以是書為贄惜未暇晤其人

跋白齋集

曹縣王叔武交李獻吉即墨蘭玉父交楊用修弇州藝苑卮言皆及之顧其詩皆不能成家右玉父

白齋集門人楊進士所貽也玉父名田嘉靖中御史以疏劾席文襄書罷歸遂不起叔武名崇文官副都御史

跋日損堂詩海陵本

節之詩天才奇恣元刻載之備矣後屬唐畊塢鄧孝威重刻于海陵刪其拗句拗字不合者不為無功然本色亦稍減矣即此本是也并存之仍題數語以眎識者

跋陳說巖太宰丁丑詩卷

自昔稱詩者尚雄渾則鮮風調擅神韻則乏豪健

二者交譏唯今太宰說巖先生之詩能去其二短而兼其兩長吾推先生詩三十餘年世之談士皆以爲定論而無異辭者以此此丁丑詩一卷公所自書蓋漸老漸熟之候而書法圓美蒼勁姿態橫生適與其詩相稱真兩絕也

跋徐節孝集

節孝先生集三十卷附錄二卷淳祐間淮南轉運判官王夔序丘洗馬象隨季貞重刻其文率拙而碎殊不成章詩尤多笑柄坡公志林謂如玉川子蓋微辭也唯江端禮子和所錄問答語一卷多可觀然仲車獨行其人在仕隱間不必以詩文重也

跋傅平叔湘帆堂集

傅占衡平叔古文實出大士千子之右味者以爲附陳艾以有聞於世耳食者也

跋孫可之皮襲美集

二則

予于唐人之文最喜杜牧孫樵二家皮日休文藪陸龜蒙笠澤叢書抑其次焉一日偶讀震澤集其跋樵集後云昌黎海也不可以徒涉涉必用巨筏焉則可之是也又書日休集後云予觀襲美與陸

魯望倡和跌宕怪偉所謂兩雄力相當者及讀文
藪多感慨激昂文中子碑配饗昌黎請孟子為學
科又幾于知道者益歎前輩鑒識之允議論之公
固先得我心之所同然而予一知半解亦自有與
古人暗合者錄其言以自信

予嘗欲取唐人陸宣公李衛公獨孤及劉賓客李
翱皇甫湜杜牧孫樵皮日休陸龜蒙之文遴而次
之為十家以傳恨效于吏事不遑卒業俟乞骸骨
歸田後當畢斯志聊書此以當息壤

題王猷定文稿後

南昌王于一猷定作寒碧琴記云昔子瞻為登州
司戶參軍子由省之攜琴游大海舟覆琴墮海後
高麗人得之獻其王王知為蘇氏物也藏之數百
年迨明崇禎間高麗困于兵請援遣總兵某帥
師救之瀕行贈以琴琴遂復還中國按東坡年譜
元豐八年乙丑五月復朝奉郎知登州到郡才五日
即以禮部郎官召作別登州舉人詩有五日匆匆
守之句公未嘗為司戶參軍且到郡非久即召少
公亦未嘗省公于登也崇禎間亦未嘗遣師援高
麗于一好奇誕而考證甚疎每為人欺多此類

又書青山集後
 墨客揮犀云王荆公過金山寺壁間得一絕句反
 復諷咏問知為郭公甫所作由此見重尤愛其兩
 句云鳥飛不盡暮天碧漁歌忽斷蘆花風又題山
 居云謝家莊上無多景只有黃鸝三兩聲荆公命
 繪為圖自題其上以金酒鍾并圖遺之予謂此四
 句亦無足取介甫事事與人異趣此亦可見

跋道康竇先生不欺文後

康熙庚辰會試榜發以公明著者四人則翰林竇
 君敏修與翰林俞寧世長城劉公琬琰禮部郭龍

浦治是也予私重四君子之為人能挺然特立於
 波靡之日既又聞敏修講學朱陽書院與嵩陽繪
 川新蔡三君子倡和而四之予於是益重敏修之
 有功正學而能見諸躬行如此繼而獲覩筠峰先
 生言行錄及道康先生家訓不欺文於是始知敏
 修之家學源遠流長本於其祖其父者如此為之
 太息愾慕不勝高景之思焉宋司馬文正公名臣
 大儒而邵堯夫謂其腳踏實地公亦謂學誠自不
 妄語始劉元城力行不妄語三字至七年而後成
 先生之學即文正公之學即大學之誠意中庸之

慎獨至誠也宜筠峰先生之有傳人翰林君之稱
肖子也已

題鮑明遠蕪城賦後

何仲默早歲使雲南作渡瀘賦遂不減此

跋陳元孝狨賦後

南海友人陳元孝恭尹作狨賦以寓諷刺其文甚工
予按陸佃云狨尾作金色俗謂金線狨一名猯猯
獼猴楚人謂之沐猴毛柔長可藉宋制官二品狨
坐不言食猴又按石狢獸名食猴則元孝之賦當
作石狢為是狢音菊異物類苑云狢如師子蒼黑

色瞑目聳耳出武當山

跋王文定公文錄

按左傳韓起聘鄭鄭六卿餞于郊宣子請皆賦子
齏賦野有蔓草宣子曰孺子善哉吾有望矣子太
叔賦褰裳子游賦風雨子旗賦有女同車子柳賦
擗兮宣子曰二三君子數世之主也可以無懼矣
夫餞大國之使而所賦皆淫奔之詩辱國已甚宣
子又何以歎其為數世之主乎此亦一證且知野
有蔓草亦必非淫詩也

跋范文肅公請定中原書後

一代之興嬴糧杖策攀鱗附翼者多矣人物之盛
无莫如兩漢之際何之諫高帝曰臣願大王王漢
中養其民以致賢才收用巴蜀還定三秦天下可
圖也良之言曰始臣起下邳與上會留此天以臣
授陛下禹初謁光武即曰古之興者在德薄厚不
以大小莫如延攬英雄務悅民心立高祖之業收
萬民之命天下不足定也故海内既平論功論行
必以鄼留高密三侯為功臣之首所謂運籌策帷
幄中決勝千里之外者也范文肅公從龍入關為
本朝名相第一翊贊密勿世莫得聞觀其勅業之

初上書諸王請定中原規模弘遠以任賢撫眾為
急勿子女玉帛是圖與三侯之言何相似也公內
行醇備家法嚴整諸子皆為名公卿尤與史所稱
高密相類予池北偶談嘗備述之數年來與叔子
大司馬同官于朝得讀是書敬盥沐手錄一通而
竊附數語于後聊以志仰止之思云

題門人朱悔人近詩卷後

遲暮衰殘欲焚筆硯久矣屢讀悔人與赤抒近詩
不勝髀裏肉生之歎

跋門人程友聲近詩卷後

昔人稱王右丞詩中有畫畫中有詩詩與画二者
 事雖不相謀而其致一也門人程友聲鳴工詩畫
 名久譟江淮間近以其七芙蓉閣詩寄予論定予
 嘗聞荆浩論山水而悟詩家三昧矣其言曰遠人
 無目遠水無波遠山無皴又王楙野客叢書有云
 太史公如郭忠恕畫天外數峰略有筆墨意在
 筆墨之外詩文之道大抵皆然友聲深於畫者固
 宜四聲之妙味在酸鹹之外也其更以前二說參
 之而得吾所謂三昧者以直臻詩家之上乘夙世
 詞客當不令輞川獨有千古矣

跋古藤書屋聯句詩

聯句有人各賦四句分之自成絕句合之仍為一
 篇謝朓范雲何遜江革輩多有此體頃見朱太史
 騰笑集有古藤書屋送吳徵君魏上舍聯句甚得
 齊梁之意握手古藤下秋深旅愁積歸來西溪旁
 猶及種春麥吳我亦袖輕鞭明發辭巷陌倦鳥不
 同飛各自張羽翮魏二子澹雅才肯為時俗役英
 詞迭相應如以桐扣石陸嘉柳塘水淥淥蒲坂山
 驛驛改歲君到時古藤花滿格查嗣大房一斗泉
 釀酒冰雪白酒熟君不來落花良可惜朱明益

三百四十
都董楠字孟才工部尚書可威之叔也常撰古今
聯句詩集六卷與張之象回文類聚皆不可少之
書

跋門人何翰林澹菴集陶詩後

兒子啓涑于綠蘿書屋之南稍以己意布置小具
丘壑命之曰清遠山居落成自賦十二詩紀事門
人何翰林世璠澹菴復集陶句和之妙出天然清
遠山者在浙之浦陽蓋道家所謂洞天福地之一
適與涑字符合故取以名

跋集古錄

順治癸巳之歲予兄弟過章丘故大司徒謝僖敏
公招飲出所刻金石錄人贈一本且云欲刻集古錄
以成雙璧苦無善本歐集校對先考功兄因言家
有藏本當奉佐讎校蓋謀梓此錄緣起如此康熙
丙子予以戶部左侍郎祭告西嶽江瀆還朝過里
索之公嗣孫琮得此本其版已多殘闕回憶癸巳
舊事倏已四十有五年而僖敏公泊先兄皆下世
已久感愴移時因記其刻梓本末如此丁丑歲重
九前五日漁洋山人書是日餞彭羨門少宰歸浙
西愴恨移日

三百四十一
跋山谷精華錄

予與李中麓太常爲鄉里後進曾購其藏書目錄累年不可得屢於京師慈仁寺市得小冊西漢文鑑一種朱印宛然後數年聞其書盡捆載歸崑山徐司寇矣康熙戊寅司寇次子章仲爲工部郎中以宋槧本山谷精華錄八卷見貽視其卷首即中麓印記在焉與文鑑無異此書藏濟南李氏二百年而歸於江南又十餘年而復歸濟南似亦有數焉因感而誌之

跋梁園風雅

梁園風雅明雍丘趙彥復微生臨清汪元范明生所撰自李獻吉何仲默王子衡高子業以下凡八人義例嚴潔予嘗勸宋中丞牧仲合劉欽謨中州文表刻之吳中以備河南文獻乙酉六月適寄到風雅新刻本乃嘉定門人陸廷燦較刊者予笑謂座客曰吾爲朋友謀則善矣吾鄉文獻乃聽其放失可乎故常欲輯海右六郡前輩作者遺集五十家斷自洪永已來如許襄敏彬黃忠宣福秦襄毅紘馬文簡愉毛文簡紀劉文和珮王叔武宗文靳兩城學顏藍田玉夫殷近夫雲霄穆文簡孔暉邊

尚書貢劉希尹天民許尚書成名王文定道殷文
莊士儋馮閩山裕汝強惟健汝行惟敏汝言惟訥
李滄溟攀龍李伯承先芳蘇侍郎祐二子沖澹楊
太宰巍劉範東隅吳太宰嶽戚少保繼光龔方洲
秉德于文定慎行兄厖眉生慎言郭魯川本傳金
沙光宅于念東若瀛李愚谷舜臣李中麓開先邢
子愿侗公文介鼎弟舉人浮來鼎馮文敏琦鍾尚
書羽正謝茂秦榛許殿卿邦才王岱如滌弟補之
袞從叔祖伯石象艮季木象春高孩之出鄒養浩
頤賢先伯父侍御府君與胤盧德水世灌王湘客
若之王太平遵坦劉節之孔和張元明光啓徐東
癡夜董樵谷樵姜如農埭如須垓趙士詰伯濬輩
擷其菁華都爲一集守官京師四十餘載匆匆未
暇今歸田矣而耄及之耳目神理非復故吾不知
斯志能終遂焉否也聊志此以俟他日乙酉六月
廿二日西堂書

跋浯溪志

祁陽浯溪山谷題中興碑頌後詩刻世謂之小磨
厓與顏書並重順治初有縣令媚其上官乃磨去
一角刻其詩過者驚惋予觀歐陽詹弔九江驛碑

材文云美玉抵禽高冠藉足又云與有道而黥無
罪而劓投四裔魑魅何以別耶石不能言其豈無
冤吾反復其言而悲之先顏後黃其揆一也

跋周櫟園侍郎印譜

古人耽一物率多成癖如嵇中散之鍛阮遙集之
屐王武子之馬謝康樂之山水皆是也若和嶠好
錢而亦以癖名則辱矣故戶部侍郎櫟下周先生
故多癖癖畫癖墨癖古印章自憂患以來大半售
爲餽粥之費此印譜幾卷其門人渠丘張待詔杞
園得之以轉贈兒子涑者當日風流好事猶可想
見而櫟老物化倏已三十年矣玩物喪志雖古之
賢達者流往往不免披攬之餘爲之三歎

跋董宗伯書徐雷州墓表墨蹟

秀水徐氏之世大于司馬公雷州公則司馬公父
也公仕不大顯而跡其蜀粵政績實不愧幹濟名
臣最其大者尤在邛部柏嶺及條六難三易爭潤
州海戎之議公墓表華亭董宗伯所撰敘事明白
條暢而書法道逸茂密在李北海顏平原之間公
元孫華隱閣學以文章濟美有光前人珍藏是書
亦徐氏之允戈和弓封父繁弱也閣學之子若孫

尚世世永寶之

跋黃石齋先生書贈太僕寺少卿中明徐公

墓表墨蹟

石齋黃先生文章氣節為明末第一流人物人少當其意其為隨州知州贈太僕寺少卿中明徐公表墓顧反復三歎稱之為粹然儒者至擬諸唐睢陽宋信國豈有所私於太僕者哉古今正氣如日月之麗天如江河之行地同道之相感如宮商之互應如芝蘭之齊芳理固然耳漳浦之文激昂隋拔不減李習之書尤入鍾元常之奧以表太僕公忠

烈洵三絕矣公孫華隱閣學以此卷屬題肅然起敬謹熏沐題數語歸之

跋朱悔人花木六咏

少陵江頭五咏語多可笑亦不成章二蘇記園中草木各十一首差強人意耳下此則李衛公咏平泉草木鏃鏃能新非洪丞相盤洲草木雜咏所及悔人六詩晚出欲與衛公二蘇公抗行又非杜洪前詩所及也

跋林佶所藏汪鈍翁手簡

康熙辛酉與鈍翁別於都門又二年癸亥鈍翁六

三才世之
十初度予寄詩云云蓋又七年庚午而鈍翁歿歿
又八年戊寅而與林子吉人相見於京師回憶辛
酉之別彈指已十九年矣循覽此帖不勝邈若山
河之感題而歸之己卯春二月二十日

跋門人林吉人所藏宋搨蘭亭記

蘭亭是右軍書第一此本是古今蘭亭拓本第一
趙子固所得蕭千巖藏本未知視此伯仲何如耳

跋孫百先所藏先世手澤 二則

雜書畫一軸其曰節齋先生者外曾祖同知公也
其曰坤野先生者外祖經歷公也曰叔明先生者

子舅氏文學公也外兄百先輯為一軸裝潢而藏
弄之禮於親之几杖琴瑟皆不敢忘以為手澤存
焉耳百先之為此其亦仁人孝子之用心也因百
拜而書之

舅氏叔明先生希周亭臨帖最得華亭董文敏公
神理書斷稱劉德昇書風流婉約獨步當時庶幾
無媿偶作墨花蕭然數筆尤具風鬟霧鬢之態皆
可寶也

東坡跋宋太宗強幸小周后圖

觀此則青城之事不足憐矣牽機之藥又何酷也

跋明宣宗御畫黑獏圖

康熙戊申歲在京師見明宣宗御畫黑獏圖上方有御筆云宣德壬子之夏廣西守臣都督山雲以獏來進朕既一覽而足間因機務之暇偶繪為圖以資宴玩念卿輔理之勤宜與同之特用頒賜以見朕意賜少傅楊榮上有武英殿寶按壬子宣德七年也文敏自建文四年太宗即位以編修直文淵閣至是在殿閣三十年矣其進工部尚書謹身殿大學士則在永樂二十二年甲辰九月仁宗即位之後加少傅則在宣德五年庚戌四月也予又

嘗於祁縣戴楓仲廷處見宣宗栗獏西山雪霽二幅

跋郭平泉圖

右郭仿王宰平泉圖一卷南宮杜編修所藏署臣郭忠恕奉旨摹有御府圖書後有東坡李氏園詩子由書書法類長公署紹聖二年十月二日按長公以元祐八年自定州南遷紹聖二年公在惠州少公亦在謫所而此乃御府所藏不知何從書之殊為可疑又有洛陽富直柔紹興癸丑春題字景定壬戌重午臣賈似道敬觀題字襄陽李友直陳

懋欽陸祖凱至正元年六月題字張渥叔厚至正
壬辰跋吳興趙孟頫子俊跋商文毅公弘載跋子
俊跋以爲李文饒洛陽平泉且引隴右諸侯日南
太守之句而卷首署李將軍畫中有偉丈夫設臯
比亭中亭下壯士林立挾弓矢衣袴褶顧盼自雄
者按平泉爲衛公別墅不應稱將軍若蘇詩乃爲
李茂貞園作鳳翔八觀之一也茂貞以僖宗光啓
三年平李昌符尋爲鳳翔節度使園正其時營造
詩中所謂云昔李將軍負險乘衰叔者是也俗又
稱皇后園蓋謂茂貞之妻然又不應稱平泉又杜

子美有王宰山水歌所謂能事不受相促迫王宰
始肯留真蹟云云則當是開元大曆間人與文饒
茂貞皆不相及尤不可解然圖畫清麗非俗筆富
趙諸題字尤精妙聊記於此俟博洽君子辨之

跋中麓畫品

章丘李中麓太常先開藏書畫極富自負賞鑒嘗作
畫品次第明人以戴進吳偉陶成杜堇爲第一等
倪瓚莊麟爲次等而沈周唐寅居四等持論與吳
人頗異王弇州與之善嘗言過中麓草堂盡觀所
藏畫無一佳者而中麓謂文進畫高過元人不及

宋人亦未可為定論也

畫品略云戴文進如玉斗精理佳妙復是巨器吳小仙如楚人戰鉅

鹿下猛氣橫發加于一時陶雲湖如富春先生雲白山青悠然野逸杜古狂如羅浮早梅巫山朝雲仙姿靚潔不同凡品莊麟如山色早秋微雨初沫倪雲林如几上石菖蒲其物雖微以玉盤盛之可也唐六如如賈浪仙身則詩人猶有僧骨宛在黃葉長廊之下石田而下無譏焉

跋楊龍友畫

康熙乙巳夏冒雨登繖山絕頂見僧舍壁間楊龍

友畫王文安

鐸

題字云筆帶煙雨蕭疎而遠正以

無意得之爾時眺聽之美皴染之妙書法之工眼中頓有三絕北渡以來憶昔游如昨夢披櫟下所藏此幀棲霞之游歷歷在目何時擺脫塵鞅去與

僧紹卜鄰閣筆三歎

跋梅瞿山畫十二松冊

宛陵梅淵公畫松為天下第一數寄予畫索賦詩

予為作七言長句又題絕句寄之忽忽已二十年

矣康熙丁丑在京師聞淵公化去妙畫通靈從此

永絕戊寅初度友人或以此冊見壽披對之下如

與故人捉松枝麈尾坐談於磊砢千尺之間不勝

感歎題寄兒子涑令珍藏之重九後二日漁洋山

人跋自題首題跋良所夢改神前世棋

跋王石谷畫冊為張敦復宗伯人

東坡云龍眠居士作山莊圖使後來入山者信足而行自得道路如見所夢如悟前世斯已奇矣然伯時自寫山居耳固宜傳神寫照如此今烏目山人吐其胸中丘壑而適與龍眠山水相遇不尤奇乎坡又云嘗見居士作華嚴相皆以意造而與佛合佛菩薩言之居士畫之若出一人今山人畫之而宗伯言之若出一人尤奇之奇者他日賜金園中珍之為龍眠掌故可矣

歷仕錄跋

歷仕錄一卷先曾大父司徒公自記生平數歷中

外居官之槩平實坦易無鋪張揚厲矜名銜才之語而於平生師友間尤三致意焉其忠厚剴切之意藹然形於楮墨之外此子若孫世世當法守者也其中大奸何心隱一事蓋顏山農何心隱皆假道學之名恣為奸利而士大夫多為其所惑萬曆中御史趙崇善者疏言其冤且言心隱以譏江陵相奪情江陵憾之授意於公為之報復云云錄中所載數年後尚有為之稱冤具疏者蓋指崇善也

又跋歷仕錄

何心隱在萬曆間屢變姓名詭迹江湖間所脅金

帛不可訾算嘗游吳興誘其豪為不軌又與一富
 室子善偕之數百里外忽曰天下惟汝能殺我我
 且先殺汝繼之湖中取其家數百金然後縱之其
 黨呂光者力敵百夫相與為死友又入蠻峒煽惑
 以兵法教其酋長事聞於朝先曾祖時為湖廣巡
 撫捕之獲於嶺北罪狀昭然迨江陵敗後御史趙
 崇善者挾私憾追劾先公殺心隱以媚江陵時先
 曾祖久以戶部侍郎養親家居矣雖事之本末自
 有公議而崇善捷捷幡幡良可畏也此事之詳具
 載大宗伯周寅所先生應賓識編王弇州先生別

集其所載顏山農挾詐趙文肅千金與姦良家婦
 為心隱所毆事尤污齒頰山農即心隱講學師也
 道學狼藉至此可為浩歎崇善此疏刻入萬曆疏
 鈔士大夫或未詳何顏顛末者恐輒信之聊復述
 及以質公論云

再跋歷仕錄

先曾祖大司徒府君昔撫楚誅何心隱一案千古
 自有定論前卷詳其顛末矣近觀馮文敏公琦北
 海集有寄府君一帖云南中縉紳皆謂何心隱行
 兼三游罪浮四凶置之憲典孰以為非三尺之平

今中丞不辨其當罪而以罪之者不存己若將移
事於臺下者蓋季孫行父逐莒僕而自以為於舜
之功二十之一也意在構怨而適足歸功於臺下
何病焉此書與弇州先生云云皆公論知趙崇善
狂吠為可恨也

跋三補驗方後

先大父平生著書最夥其大旨在於惇倫厚俗利
生濟物中間羣芳譜元板貯琴川毛氏汲古閣後
已散在質庫康熙辛巳予既曲贖以歸告于祖廟
茲驗方寫本則癸未冬十一月長至得之京師慈

仁寺市几杖琴瑟音容如在吾世世子孫其永寶
之大父洎先大夫皆以今年三月十八日 覃恩
累贈 經筵講官刑部尚書云

自跋米氏研山歌後

南唐李主研山後歸米元章米與蘇仲恭學士家
易北固甘露寺海岳菴地宣和入御府事詳避暑
漫鈔後又四百餘年不知更易幾姓而至新安許
文穆^國家已而歸嘉禾朱文恪^國子戊辰春從文
恪曾孫檢討彞尊京邸見之真奇物也檢討請予
賦詩既為作長句又題一絕句云南唐寶石劫灰

餘長與幽人伴著書青峭數峰無恙在不須淚滴
 玉蟾蜍後二年復入京師則研山又為崑山徐司
 寇購去矣今又十五年不知尚藏徐氏否青峭數
 峰蓋用南唐元宗語元章既失研山賦詩云研山
 不可見我詩徒歎息惟有玉蟾蜍向予頻淚滴皆
 用本事也

自跋題李西涯樂府詩

右題西涯樂府後詩一首予康熙乙卯補官京師
 作時年四十二又三十一年乙酉以迎 駕之役
 再至安德從方山郎中齋重睹手蹟恍如隔世此
 詩亦佚去久矣歲月如過隙白駒世事如雪上鴻
 爪俯仰今昔不勝感歎閏四月二十日書

自題齊州脞記

齊州脞記一帙無卷第無倫次無義例蓋康熙庚
 午辛未間郡中修濟南誌淄川唐太史實為職志
 而予方守官都下每公暇覽羣書遇其關郡掌故
 者輒命侍史筆錄之將薈粹以寄唐適予遷戶部
 侍郎案牒旁午而郡誌已告成事遂不果寄尺蹠
 零雜未能棄捐為泥牕覆甑之具聊復存之竹頭
 木屑將來或以備庸峭未可知也

木風絲來楚心前風散未日味也

帶經堂集卷九十二

命卦史筆難之錄卷第以何事座子懸之將

亦年六字留落下每公知覽章書器其開張掌姑

千年未聞張中於齊南誌留川惠太史實為鄰志

齊國細信一知無卷第無命尤無善何蓋東照爽

百銀齊快銀信

亦部外今昔不翻為漢聞四月二十日十

詩亦知去久矣歲月以過留台臨世事



律